

東
華
續
錄

東華續錄

道光五十七

臣王先謙敬編

臣周潤蕃恭校

道光二十八年戊申春正月丁丑諭本年元旦淑氣晴明和風翔
治見值諸務靜謐民物阜安從此仰荷 天庥咸登壽宇因念及
在廷王大臣等有年屆八旬贊襄盡職或歲逾七十亦皆精神彊
固供職克勤故得以感召庥徵作熙朝之人瑞允宜恩施特沛以
昭優眷而迓祥和肅親王敬敏之子三等侍衛不入八分輔國公
華豐著加恩授爲散秩大臣貝勒蘇恩之子三等鎮國將軍奕縉
著加恩賞給頭等鎮國將軍大學士潘世恩著加恩晉加太傅銜
並賞用紫緡大學士寶興著加恩賞給太保銜尙書保昌阿勒清
阿李振祐都察院左都御史成剛均著加恩賞給太子太保銜都

統中山之子乾清門三等侍衛穆騰阿著加恩賞給三等侍衛在御前行走用示朕尙齒引年錫類施仁至意○甲申湖南乾州廳苗匪被剿悔罪自首命裕泰等分別懲辦仍控擊餘匪○己丑賞已革山東巡撫崇恩藍翎侍衛爲駐藏幫辦大臣○庚寅諭前據王植奏江廣漕船准帶竹木與舊案懸殊請敕部覆一摺當交該部妥速議奏茲據該部覆奏著仍照前署兩江總督陸建瀛漕運總督楊殿邦前奏所有漕船天蓬竹木准其循照舊章高二尺而不計寬長總以天蓬爲度兩旁跨木亦照舊章各寬二尺而不計深長總以船身爲度此外如有奸商影射及例外多帶情弊著責成各該糧道督飭各幫員弁認真查驗覈實結報並飭各關監督實力查丈以杜爭執而利漕運至各關歷年科算參差未經報部有案不可不畫一辦理以杜各弊著兩江湖廣總督江蘇安徽江

西湖北湖南各巡撫會同漕運總督查覈明確準情酌理迅速妥議章程連銜會奏以爲永遠遵行之制再漕船准帶土宜原爲津貼體恤起見惟例外多帶既應查驗於未經開行之先尤宜嚴防其中途裝帶之弊著湖廣江西各督撫轉飭各該糧道實力查驗並開列艙口清單先期飛移各關俟糧船抵關時按單查驗認真辦理惟江西漕船抵關時每多連檣經過不候查驗藉口於限緊溜急每多夾帶著查照兩湖漕船章程到關暫停或溯流迎查俾得覈實稽查無誤進行總當見船卽驗一驗卽行斷不准稍有遲延透漏以速運務而重關稅尋江西巡撫吳文鎔奏漕船例帶土宜歷係開明貨色清單呈驗但未將何艙帶何土宜分晰開列自應遵辦以杜例外多帶之弊至江西糧船幫多船眾蕪湖關南北兩岸河面狹窄不能排列候驗溯流迎查較爲妥便查安徽銅陵

縣屬大通鎮馬頭寬闊距蕪湖關百餘里應請卽於此處暫停候

驗從之○禮部左侍郎連貴卒予祭葬賞銀五百兩治喪予其子

員外郎明恩卽選○以聯順爲禮部左侍郎

由內閣學士遷

○乙未以慶

端爲江蘇按察使

由甘肅鎮迪道遷

○戊戌越南國王阮福暉卒奉表告

哀詔停本年呈進方物○庚子諭軍機大臣等林則徐等奏提解

控案延未赴解等語雲南永昌地方漢回挾嫌互殺經該督撫等

出示切實開導漢回已具結互保矢無反覆惟香匪見經提解竟

敢藉詞意圖抗匿該匪等平日燒香結會往往挾嫌擅殺平民匪

不報官茲於提解人犯復敢糾約庇匿意欲抗拒此風斷不可長

著林則徐等諄飭該道府等妥爲曉諭釋其疑慮固不可操之過

促致滋決裂亦斷不能任其抗拒不遵提訊總須默化潛移挽回

風氣以綏邊徼而靖兇頑○葉爾羌參贊大臣奕山等奏霍罕道

夷使於十二月十二日至喀什噶爾據稱帶有該夷明巴什木素滿庫里稟面情詞恭順得旨彼此言語不通文字難憑加以反覆無常之性斷不可信以爲實惟有慎守邊疆習練武備善撫各城回衆俾令心不外向自能安善慎勉爲之毋忽毋怠○免喀什噶爾被匪滋擾之民回各戶正雜額賦逋款○是月展賑直隸鹽山等五縣災民給安徽鳳陽等三縣水旱災口糧貸湖南安鄉縣山西甯遠等四廳縣甘肅皋蘭等七縣災民口糧籽種緩徵陝西蒲城縣逋穀展緩直隸安州等三十六州縣山東臨清等三十六州縣暨德州等五衛浙江仁和等十三縣被災新舊正雜額賦

二月戊申 上御經筵○己酉調趙光爲戶部左侍郎轉黃琮爲

兵部左侍郎以何桂清爲兵部右侍郎

由內閣學士遷

○壬子諭載銓等

奏承襲奉恩將軍次數未能盡一請將軍功旁支子孫分別襲替

次數一摺向來軍功王公旁支子孫承襲奉恩將軍例無分別嫡
派旁支作何襲替明文是以或襲五次或襲三次辦理未能盡一
除從前辦理兩歧之處毋庸查辦外嗣後凡承襲奉恩將軍著查
明原立官之人係軍功王公餘子之嫡長子如無嫡出子或庶長
子之子孫其後嗣子孫降等襲封之奉恩將軍者方准照例襲至
五次而止如原立官之人係軍功王公餘子之餘子或庶子之餘
子及有緣事削去爵職其子孫內尚有已經考封並襲封者自與
恩封之人無閒卽不得均謂之軍功旁支子孫如降等襲封至奉
恩將軍或考封奉恩將軍者均照恩封之例襲至三次而止該衙
門卽照見定章程辦理並著纂入則例永遠遵行○吏部尙書恩
桂卒晉贈太保賜其子常照三等侍衛○調文慶爲吏部尙書保
昌爲兵部尙書以麟魁爲禮部尙書○命文慶毋庸在軍機大臣

上行走○以寶清署刑部左侍郎張祥河爲甘肅布政使

服闋布政使

○辛酉諭軍機大臣等林則徐等奏保山縣七哨匪徒打奪解省人證隨又焚燒縣署殘殺城內回民見在籌辦情形一摺覽奏已悉雲南永昌漢回互相讐殺前經調兵勦辦甫就撲滅乃頑悍之徒藐法已久茲復因永昌府縣會營押解京控犯證該匪等輒敢於中途劫去旋又擁入城內焚燒保山縣署監犯盡行放出先經招復之回民見被投殺無存鎮道府縣俱被圍困在城道路梗塞文報沈滯不法已極必應痛加勦洗方足挽回積習林則徐見已檄調各營精兵分投進勦並已親往大理府督辦榮玉材業經帶兵前往相機攻勦固當分別良莠不可妄殺無辜致失眾心尤不可再示姑容稍留餘孽所稱鎮道府縣皆被困窘在城每日市糧限數出糶見在曾否解圍該鎮道等如何著落著卽查明由驛具

奏其瀾滄江爲赴永昌必由之路江橋板片見被該匪等拆斷聚眾把守尤當迅卽設法擊散賊眾修復橋道鐵索俾文報得通勦辦方能得力至軍需經費除於鹽課項下借動十萬兩外所有雲南貴州兩省見收捐輸之款並准其先行動支以濟急需程裔采在省督催各路官兵籌辦糧餉俱當悉心商辦務使兵威遠振漢回各匪盡皆懾服斷不可稍有挫失以靖邊圉而除兇頑○以勦辦湖南新甯縣會匪予巡撫陸費琅等優敘賞鹽法道楊炳堃等花翎舉人江忠源等藍翎○貸湖南永綏鳳凰二廳苗寨籽種○壬戌諭太監郭洪鵬逃走四次曾經發打牲烏拉爲奴期滿釋回後仍敢潛逃在外持刀傷人怙惡逞兇不法已極著發往黑龍江給官兵爲奴遇赦不赦嗣後遇有在逃太監在外滋事除傷人至死按律問擬外但有執持金刃傷人確有可據者俱著照此辦理

○癸亥四川總督琦善奏川省兵力素弱見令各鎮協揀派兵丁赴省教練俟學成同營轉相教習至四廳兵丁均係就地召募恐與夷人認識往來嗣遇本營兵丁拔補千總外委卽爲調防以杜流弊得旨如此用心又能得當不但不負委任實安邊之良策朕甚嘉悅之至○戊辰以縣森夾山葉觀儀俱爲內閣學士兼禮部侍郎銜縣森由太僕寺少卿夾山由葉爾羌參贊大臣葉觀儀由少詹事遷○是月展緩江蘇泰州等三十二州縣及淮安等四衛逋賦

三月戊寅諭林則徐奏匪徒勾結滋事調兵剿辦地方安靜一摺覽奏均悉雲南趙州彌渡地方內外匪徒勾結滋事焚殺擄搶且敢圍署傷官經該督調兵先往剿捕將匪犯殲獲數百名並撫卹受害良民地方均已安靜見在酌留官兵堵拏緝犯著該督嚴飭該弁兵等實力查拏務將逸犯悉數擒獲毋任一名漏網此次在

事人員著擇其尤爲出力者據實保奏毋許冒濫○己卯諭軍機大臣等奕山等奏霍罕夷使呈遞稟詞譯漢呈覽此次逆回由霍罕逃出至喀什噶爾滋事既據該夷使供稱該伯克並不知情且所遞稟詞俱屬恭順著加恩准其照舊通商免稅自放呼岱達以示懷柔所有賞給該夷使銀六百餘兩並蟒袍袖段等件均准作正開銷○壬午 上啟鑾謁 西陵○免經過地方額賦十分之三○丙戌 上謁 泰陵 泰東陵 昌陵詣 孝穆皇后 孝慎皇后 孝全皇后陵寢奠酒回鑾○己丑諭嗣後揀選大門上三等侍衛由黏竿處藍翎侍衛內擇其差使勤奮騎射好者著該管大臣每旗保送一人共保三人歸入各旗營護軍校驍騎校內一體揀選著爲例○庚寅 上還京師○癸卯諭軍機大臣等林則徐奏保山七哨懾服軍威縛獻匪犯多名仍飭圍拏一摺覽奏

均悉所辦好永昌哨匪滋事該督親駐永平督兵入哨該哨匪等傳聞此次所調兵練甚多又聞彌渡用兵殲殺無算望風悔懼見已送回監囚繳還軍械並縛獻匪犯一百三十餘名經府縣訊取初供已據承認多係傳帖糾人抗官焚署之犯並經該督覈對京控被告名單捉犯互相識認所獲實皆本人等語該地方各匪於兵到時卽先投誠獻犯惟所獻之犯有無祖庇藏匿必應查究務期所獻實皆本人首犯尤關緊要應令按名交出仍一面明查暗訪斷不可有一名頂冒致有漏網該犯等聚眾抗拒已成積習若不趁此兵威痛懲將來必仍反覆豈有時常徵調之理見在雲貴兩省勁兵偏處不患其不畏懼如悔罪非出至誠僅憑劣員從中調處稍示輒弱日後何以綏靖邊圉耶林則徐等惟當示以兵威廣加曉諭儻略有恃眾難馴情形仍當立予勦洗姑息適足養奸

戒之其前經圍困在城之鎮道等是否因力難抵禦畏蕙無能甘被圍困抑或因事起勢辦理不善儻止顧身家苟全性命有辱國體亦應查明懲辦不可因事過遂置之不問見在解圍後該員等作何下落著一併查明據實具奏有應參處者據實嚴參以儆將來又另片奏迪西久爲盜藪非重兵無以埽清等語勞師糜餉原非善策然此次調兵較多勦平哨匪之後如該督以爲必應乘勢掩捕方可一勞永逸卽著該督會同提鎮擇其要害壓以重兵所有著名匪類責令指名縛獻總期漢回各匪盡皆懾伏盜蹤淨絕邊圉肅清方爲不負委任○是月貸山西吉州等七州縣歉收倉穀並緩徵解州等十五州縣通數

夏四月庚戌 上奉 皇太后幸 皇四子 皇六子奕訢所○乙卯申諭兩廣湖南江西各督撫飭拏會匪○辛酉諭軍機大臣

等朕恭閱 皇考仁宗睿皇帝實錄嘉慶四年 高宗純皇帝奉

安 裕陵特派文武大臣侍衛等敬謹守護嗣於嘉慶九年復有

旨將年老十餘員加恩令其來京朕思此項人員先經派往旋

又撤回其中且多衰老之員既於守護難期得力即可無庸派往

此例著永遠停止交軍機大臣敬謹存記○戊辰諭林則徐奏訊

辦保山滋事匪徒並究辦倡亂匪徒及分別酌撤官兵各一摺覽

奏均悉雲南保山縣匪徒沈振達等前因被回民京控輒敢倚恃

匪徒金混秋邪術糾眾劫奪提解案證焚燒官署將該處招復回

戶肆行殺戮並商同阻截文報抗拒官兵經該督等檄調各營精

兵分投進剿先行出示曉諭並於彌渡一案大振先聲該處民人

畏懾軍威輸誠悔罪迨全師壓境之時卽有眾庶獻俘之舉見在

首要各犯查拏到案者三百餘名分別正法擬罪辦理尙爲迅速

各營兵弁著分別撤令歸伍此案事起倉卒眾寡不敵竟能迅速
藏事不至老師糜餉文武員弁應得處分及失察各職名均著加
恩免議其未獲各犯仍著嚴飭文武員弁督率兵役認真搜捕淨
盡分別懲辦勿留餘孽經此次懲創之後務當嚴禁妖術勸導鄉
愚俾得永杜奸萌共安作息所有善後各事宜著詳細籌議具奏
○己巳前任閩浙總督程祖洛卒贈太子太保賜祭葬諡簡敬

五月甲戌諭軍機大臣等徐繼畬奏飭屬整頓聯甲等語閩省延
建邵三府民俗本淳因外鄉游民廣集傭趁工作搶劫結會之案
甚多該省此次拏獲會匪深得聯甲之力該撫見復派委幹員前
往建陽縣將聯甲章程整頓俾客民土著聯爲一體禁其相率入
會其泉州漳州等府永春州廣東等處民人在彼居住者大槩搭
棚散居山谷不連村莊勢難強爲聯合該撫見飭就其地勢分段

編聯揀派聯首專其責成常川稽查並通飭各府縣遵照辦理著該撫卽嚴飭該地方官等實心實力嚴密稽查認真妥辦務使聯甲之法持之永久偏僻之地毋令藏垢納汙俾奸匪斂戢地方綏靜切勿日久生懈奉行不力轉成紙上空談無裨實濟是欲祛弊而適滋弊也○癸未賞耆英雙眼花翎○壬辰諭軍機大臣等本日據刑部密奏見審案內究出贓款數萬兩請飭查辦並將各項人犯開單呈覽已明降諭旨將候補知縣陳怡和縣典史陳銜恩革職並案內應訊人證一併解訊矣此案在籍巡撫梁粵涵被訐前在山西巡撫任內有求免充商一事得受多贓見由刑部訊據已革郎中孫郅供認實有託該撫之弟梁楫滋賄屬情事並呈出手摺內所列得贓之官員吏役幕友長隨人等節節貪婪數盈五萬餘兩必應徹底究追水落石出著王兆琛迅卽遴派幹員查照

單開各犯姓名分投嚴密訪拏送部勿令其聞風遠颺並不准一名漏網至前署河東道查克丹雖已身故其幕友丁役人等必有當日知情經手之人並著該撫計算年月確查嚴緝以上人犯一經獲案卽先由該撫密訊供情如此外續經供出之犯料係案內必應關提查拏者卽著該撫迅速酌覈解部免致日後展轉稽延該犯等轉得乘閒逃逸是爲至要○是月展緩陝西華州等十五州縣積欠米石

六月癸卯朔張澧中卒以徐澤醇爲山東巡撫劉源源爲山東布

政使蔣霽遠爲山東按察使

由雲南進南道遷

○甲辰諭巡撫兼提督銜

非特旨賞花翎者毋庸戴用○乙巳諭林則徐奏見乘凱撤大兵分投捕獲歷年竄擾要犯多名審明立置重典一摺林則徐此次督兵進剿於永昌七哨懾服軍威後復乘凱撤大兵將歷年永順

雲緬軍營勦散餘匪搜捕多起究出戕害擄禁員弁拒殺兵丁練
勇各要犯七十六名審明立置重典自足大快人心永昭炯戒此
外尙有夥同支解趙發元之姚老五一犯雖據見犯供稱已被擊
殺恐難盡信仍著該督派員密訪確蹤毋任捏飾倖逃法網其前
在永昌軍營陣亡之署守備趙發元既據查明道光二十六年駐
守飛石口時賊匪馬二等夾其讎路該署守備大罵不允並發矢
射中賊首張富脣吻致賊匪支解挖心吞食情實可慘且該署守
備本係回人深知大義敵愾捐軀尤堪嘉尙趙發元前已有旨賜
卹著加恩照參將例賜卹所有該部前遵諭旨議卹之處著卽撤
銷並賞銀三百兩卽由該地方官支領庫銀交該故員家屬收領
以慰忠魂其餘查明應行議卹之各員弁兵丁均著該督咨部照
例覈辦餘著照所議辦理至永昌鎮道等已據查明並非甘心困

辱亦無激變情事免其治罪其應得處分著該督覈其輕重定擬

具奏○丙午命耆英留京管禮部事實授徐廣縉兩廣總督欽差

大臣以葉名琛爲廣東巡撫李璋煜爲廣東布政使趙長齡爲廣

東按察使由鹽運使遷○己酉以雲麟爲廣西布政使陶樸爲甘肅按

察使由湖北漢黃德道遷○甲寅 上詣 黑龍潭祈雨○庚申諭琦善奏

查補營員空糧夥糧並甄別兵弁等語所辦是四川外營留省當

差員弁向有分食空糧夥糧之弊前經該督奏明將留省各員盡

遣回任茲又將通省空糧夥糧查出九百餘分全行考補足額除

裁汰衰劣弁兵另補外甄別不得力之千總把總等八十八員積

弊相沿一加釐剔儻能持之以久營務自日有起色國家設立營

伍原期一兵得一兵之用若糧餉空虛兵數缺額廢弛日甚何能

操防因思四川如此他省可知著各省督撫嚴行分別稽查各營

內如有前項空糧夥糧等弊或名目不同均卽力加禁革其兵弁衰弱庸劣亦當隨時甄別毋使濫竽充數已往不咎咸與惟新自接奉諭旨後各該督撫等當有弊必除事事力求實濟以副朕整飭戎行之意儻日後有人參奏或別經發覺仍有空糧等項情弊考其年月惟該省督撫提鎮是問○諭琦善自簡任督撫以來辦事尙屬認真此次以二品頂帶補授四川總督到任後加意振作於吏治營伍緝捕各事宜尤能實心整頓不避嫌怨著加恩賞還頭品頂帶以示勉勵○諭前任山西巡撫梁萼涵身任疆吏於署內弟姪人等往來營私納賄何竟毫無見聞梁萼涵著卽革職交徐澤醇仍遵前旨酌派文武大員迅速押解來京交刑部歸案質訊不准稍有耽延此案除房山縣典史梁林滋山西候補從九品梁琯森已經革職分別審訊押解外直隸候補佐雜梁珠森亦係

案內要證著卽革職交步軍統領衙門順天府五城一體嚴拏解送刑部歸案審訊並著直隸總督查明該員因解京差會否回省其原訐之楊錦一名著山東直隸地方官沿途一體催趨解京不准遲延○甲子諭楊國楨歷任封圻並無過失止因召見時見其骸疾未痊步履艱滯特降旨令其回籍調養且伊故父楊遇春宣力有年戰功超著兼勤疆寄楊國楨著加恩准其在籍支食世職全俸以示朕篤念盡臣推恩延賞至意○丁卯諭各省文職自知縣以上武職自守備以上有無故輕生者專摺奏聞○諭軍機大臣等刑部奏請飭提書吏門丁歸案質訊等語此案已革前任巡撫梁萼涵於被舉充商之孫陳笏故後兩次批令另舉殷戶接辦是孫邳等之准免充商皆該革撫自作主持並無河東道詳請免充案據應行提訊當時承辦書吏著王兆琛迅將該處鹽案房承

辦此案書吏喬桂程汝夏委員押解迅速來京交刑部歸案審訊
毋得稍有稽延並著該撫查明梁夢涵在山西時二十四五兩年
所用門丁如有尙在山西之人亦卽一併迅速解部以憑嚴訊○
戊辰梁寶常丁憂以傅繩勛爲浙江巡撫馮德馨爲江甯布政使
勞崇光爲廣西按察使由山西冀甯道遷○庚午調吳文鎔爲浙江巡撫
傅繩勛爲江西巡撫○是月緩徵山東臨清等十一州縣並德州
衛被災新舊額賦

東華續錄

道光五十八

臣 王先謙敬編

臣 周瀚蕃恭校

秋七月丁丑申禁各地方官衙署內外容留親屬並子孫隨任毋得干預○甲申山東巡撫徐澤醇奏查各州縣盜案雖無抑勒諱匿情事而地方既有搶劫之案惟有督飭所屬文武各員認真緝緝以淨根株得旨除惡安良當務之急文武疲玩第一可恨汝初膺重任當如何振作報國安民朕拭目以待也○戊子申定宗室承襲世職人員仍留本任例○庚寅以勦辦雲南彌渡保山哨匪功加林則徐太子太保賞花翎○庚子諭李星沅等奏江蘇外海水師戰船不敷請籌捐添造一摺水師戰船巡緝攸關必應多爲豫備著准其將江南善後存餘銀兩先行提撥趕緊設廠添造○

是月緩徵山東臨朐縣被災歉收逋賦

八月癸卯實授寶清刑部左侍郎○甲辰申定道府以下官員祖孫父子及外姻親族同省同府回避例督撫與河督鹽政有關糾察者亦令回避○徐廣縉奏英人見與弗蘭西構釁粵關收稅日形短絀因進口貨物較多漸形壅滯洋商又多折本並因該洋人等構釁無暇兼顧貿易前此英人求進廣州城經耆英與德庇時以二年後爲約來春計已屆期見在英國更換文翰臣仍當相機辦理○壬子諭前據御史楊彤如奏河南賈魯河挑挖糜費將國帑百萬輕擲迄無成功並未將辦理不善之員分別參處賠修河陝汝道施熙貪名素著所至侵蝕錢糧等語當交福濟駱秉章親往履勘訪察據實具奏茲據福濟等奏稱查明該省與挑買魯河三次共用銀五十四萬餘兩錢四萬串覈與原奏百萬數目不符

惟甫經完工卽行淤墊總由勘估未能認真承挑工員復草率從事糜帑誤工咎無可辭所有初次承挑賈魯河總管委員前任開封府知府見升河北道長臻總辦委員前任開封府同知見升四川成縣龍茂道馬秀儒前候補同知捐升知府鄭榮東河捕河通判朱品金二次歲修總辦委員前任祥符縣知縣見升許州直隸州知州金梁著暫行革職仍著該撫勒限飭令認真賠修儻河道不能深通利運卽著嚴參懲辦其河南省各缺著該撫派員署理並著琦善催令馬秀儒迅卽前赴河南辦工成縣龍茂道缺亦卽派員署理河陝汝道施熙雖查無貪墨實迹惟承辦改挑河道未能一律寬深亦屬辦理不善著交部議處仍卽行送部引見河南巡撫鄂順安於此等鉅工未能先事詳勘辦理及河道淤塞又不將辦理不善之員據實嚴參迫經捐廉改挑復不奏明實屬草率

於前徇隱於後著交部嚴加議處所有賈魯河工程應如何責成各員按成賠修之處著該撫酌定章程依限興工務須加展寬深沿河橋閘均令修整不准稍形草率以期經久工竣專摺具奏又奏前賈魯河完工後經該撫奏明將捐輸錢六十萬串交典鋪生息作爲歲修之用今既責令各員賠修此項錢文毋庸再作開銷等語著該撫卽飭藩司查明貯庫咨報戶工二部備覈御史楊彤如著賞加二級○丁巳諭河南巡撫鄂順安辦理賑務及賈魯河鉅工未能妥善咎實難辭著卽照部議革職布政使王簡於散放賑銀及賈魯河錢糧是其專責厥咎維均著改爲革職至按察使吳式芬於此重大兩案尙非專司而各案失察亦難辭咎所有部議降留之處著改爲革職留任八年無過方准開復以昭平允河陝汝道施熙承辦改挑河道未能一律寬深著照部議革職毋庸

再行送部引見○以潘鐸爲河南巡撫吳振械爲山西布政使武

棠爲貴州按察使

由福建
鹽道遷

○以嚴良訓爲河南布政使郭夢齡爲

陝西按察使

由甘肅
道遷

○庚申諭軍機大臣等有人奏廣西盜劫

各案請飭嚴緝等語據奏北流縣境有陳李二姓於道光二十六

年爲盜匪擄掠橫州所屬南鄉墟地界本年五月內有商船二十

餘號並遭搶劫計賊一萬餘金均未緝獲一犯如果屬實地方文

武所司何事查粵貨入滇百色地當孔道聞比年來亦復劫案頻

仍若不及早創懲何以靖閭閻而安行旅著鄭祖琛督飭該州縣

營員嚴密訪查確實認真捕緝務令奸匪卽時弋獲不准一名漏

網毋致諱劫爲竊化有爲無被不肖屬吏欺蒙也○辛酉諭軍機

大臣等李星沅等奏俄羅斯商船請在上海貿易已飭開導回帆

一摺覽奏已悉俄羅斯向在北路陸地通商不比西洋各國航海

貿易上海非該國應到之地所請自難准行已據該督等以事關
通商大局必應率由舊章飭令妥爲勸諭並諭英領事阿利國隨
同開導情願立限駛回不至遷延觀望所辦甚屬妥協可嘉之至
以後該國商船如果再來曉瀆該督等惟當循照定章以理阻却
斷勿令其時存覬覦致啓效尤之漸○丙寅以孫葆元爲兵部右
侍郎調李嘉端爲內閣學士兼禮部侍郎銜季芝昌爲倉場侍郎
轉侯桐爲吏部左侍郎調張芾爲吏部右侍郎以彭蘊章爲工部
右侍郎由左副都御史遷○戊辰調陶樸爲山西按察使明誼爲甘肅按
察使

九月甲戌潘錫恩以病免以楊以增爲江南河道總督陳士枚爲

陝西巡撫由四川布政使遷

○乙亥諭全慶奏歲試全竣科試四府各場

情形一摺覽奏均悉考試設有認保原以糾察弊端該學政考試

嘉應州時該童生竟有以其父兄作爲認保者是查弊轉以滋弊殊堪訝異廣東如此他省恐亦不免著各該學政等認真查明如相沿陋習有以父兄爲認保等事卽行禁止儻不更改別經發覺惟該學政等是問至考試武場校閱技藝總以馬步箭刀弓石爲重果能演習精熟自足致用若如全慶所奏廣東武場校試竟有馬上舞刀並射金錢各名目是止求飾觀誇巧毫無實際於取士之道大相徑庭著全慶亦槩行禁止如各省有此惡習並著嚴諭裁革以副朕黜華崇實至意至私造牌示及以桶盛箭各弊均著全慶隨時講求損益力挽頹風○調吳振棫爲四川布政使以兆那蘇圖爲山西布政使積喇明阿爲福建按察使由江南○辛巳諭前據林則徐奏查拏迤西匪犯請審明立時懲辦毋庸解省審轉當交刑部議奏茲據該部查覈具奏雲南迤西一帶界在邊隅

嗣後該地方除尋常命盜各案仍按例辦理外如有黨羽眾多匪犯准其批解該管道府於審明移交臬司具詳督撫覆准後就地正法以儆兇頑並請酌定年限等語該處軍務甫竣餘匪正當嚴辦著卽予限五年俟限滿後仍照例由督撫親提審明題奏以示限制而昭畫一○黃琮以親老乞養允之轉孫葆元爲兵部左侍郎以戴熙爲兵部右侍郎由內閣學士遷○以朱履爲陝西按察使由江西糧道○甲申撥江蘇藩關各庫銀七十八萬餘兩備江甯等三府水災賑需○乙酉命戶部籌撥銀六十萬兩賑湖北水災並准有隄各州縣以工代賑○癸巳召喬用遷來京以羅繞典署貴州巡撫由布政使署○丙申以江蘇水災免各關商販米稅○雲麟以病免以張雲藻爲廣西布政使李本仁爲安徽按察使由江西績甯道遷○是月給湖南武陵等四縣水災口糧屋費

冬十月壬寅諭軍機大臣等徐廣楨等奏接據文翰照會來詢進城一事當經剴切駁斥此事前經耆英許以二年爲期諒係一時權宜入城之舉雖非騷擾無如粵民剽悍一聞進城之議無不切齒同仇卽如上年黃竹岐一案僅止數人登岸嬉遊卽被毆斃天朝辦理庶務一秉大公卽時審擬兇犯抵罪今以省城人民之厭儻貿然入城百姓沸騰羣肆攻擊官亦無從鈴束若必因從前曾有此說以實其言未免拘執召悔自思當無以自解如此反復開導俾曉然於有害無利有損無益之故諒必廢然而返不復爭執前說○甲寅文華殿大學士寶興卒命 皇四子奠茶酒予祭葬諡文莊○丙辰諭戶部奏積欠案內各省未完地丁銀兩延未報完開單呈覽請旨飭催另片奏查歷屆恩詔豁免之數漸次加增並請隨時清釐各等語地丁爲國家正供不容絲毫短絀茲據戶

部查明各省未完地丁正耗自普免道光二十年前逋賦之後至今又積欠正徵緩徵銀二千三百九十萬餘兩之多似此年復一年各省大小官員幾將置錢穀於不問積習相沿伊於胡底且道光二十年前逋賦共免銀九百三十餘萬兩民力不爲不寬乃地方官視爲成例積欠日多完解日少上次經戶部奏催之後各省大半完納新款其舊款則任意宕延冀得屆期豁免是以國家蠲租免賦之恩藉遂有司侵蝕虧那之計思之實堪痛恨當此經費支絀之時該督撫等全不以國事爲重玩愒因循尙復成何事體所有戶部單開各項除本年報災之區著該督撫體察情形分別辦理其餘有前項積欠省分自道光二十一年以後未完地丁正耗銀兩務令勒限全完緩徵之款亦令遵照原展年限隨同正徵完納迅速報解儻查有不知愧奮或有以完作欠情弊立即從重

奏參嚴議以爲玩視度支者戒並著各督撫責成藩司於該州縣
每年應徵未完及緩徵屆限各款詳細覈查毋得任聽各屬虛報
欠數有增無減希冀彌除致滋流弊嗣後遇有覃恩之年著戶部
按照各該省積欠清冊逐款句稽如有無故而欠數較多者卽由
戶部查明據實參奏並將應否豁免之處奏明候旨各該督撫等
務當破除積習激發天良陸續嚴催認真釐剔如或視爲具文意
存瞻顧下無以蘇民生上無以紓國用定將該督撫等懲處不貸
○丁巳申諭劉韻珂等飭拏浙江沿海盜匪○申諭海疆各督撫
提鎮督飭水師堵拏洋盜○庚申諭已革前任山西巡撫梁萼涵
因鹽務派商訊無徇情受賄情事惟以封疆大吏於所屬官吏種
種貪婪未能查辦已屬咎無可辭又於總服弟梁琳滋撞騙多贓
毫無覺察厥咎尤重著照部議發往軍臺效力贖罪姑念尙無贓

款所有前查封家產著加恩賞還已故蒲州府知府護理河東道

查克丹查係京察人員案犯贓私所有從前保列一等之工部各

堂官著吏部查取職名照例議處○辛酉起祝慶蕃爲內閣學士

兼禮部侍郎銜○以黃贊湯爲左副都御史

由宗人府
府丞遷

○壬戌祝

慶蕃以年老休致○甲子諭前據福濟駱秉章奏查辦江蘇府縣

被參各款已降旨將各該員分別治罪嚴議並銷去保舉矣因思

封疆大吏於屬員賢否原當隨時查看若必待欽差始將劣員懲

辦國家安用此大吏爲耶此次江蘇府縣被參各款該督撫何以

毫無見聞其平日姑容寬縱已可槩見李星沅陸建瀛均著交部

分別議處至藩臬以下該管上司應議職名著一併查取分別議

處福濟駱秉章既將各員款蹟查訊明確定擬具奏並不將各該

上司隨案附參亦屬疏漏著傳旨嚴行申飭○丁卯以毓書爲盛

京刑部侍郎

由內閣學士遷

○是月賑直隸通州等七州縣安徽無爲等

十六州縣水災給安徽和州等十四州縣湖南華容縣岳州衛災民口糧貸湖南安鄉縣澧州災民籽種蠲緩直隸通州等五十二州縣湖北沔陽等三十九州縣衛湖南澧州等九州縣安徽泗州等二十四州縣被災新舊額賦緩徵山東臨清等三十七州縣衛山西薩拉齊等三廳縣被災新舊額賦展緩齊齊哈爾等四處歉收通賦

十一月壬申廣西巡撫鄭祖琛奏道查北流等處劫案已獲犯分別嚴辦見在地方安堵得旨不可一奏了事務要嚴密訪緝○癸酉允李星沅等奏江蘇各屬新漕仍歸河運○己卯命耆英爲文淵閣大學士以琦善協辦大學士仍留四川總督任○癸未貝勒縣恩卒命 皇六子奕訢臨奠賞銀五百兩治喪○甲申諭工部

奏應追各款完交甚少請旨飭催等語各省應賠各款皆待用要需自應依限完解茲據工部查明應追款項爲數甚鉅完交甚少當此紛紛籌賑度支孔亟之時各直省大吏宜如何趕緊催提力籌國計且賠項未交多係見任實缺人員並非盡係無力乃竟積習因循屢催罔應緊要款項視爲具文籌國疆臣捫心應如是耶所有各省著賠分賠攤賠代賠溢領覈減之款著各省督撫河督於所屬實缺司道府廳州縣各員無論本身應賠及代賠各項俱著照該部所開清單勒限催追完繳解交就近被災省分備賑仍將完交數目起解日期奏報各該大員受恩深重於本身賠項更宜首先完繳則屬員賠項亦必不催而自應其無賠項者於所屬無所瞻徇咸服公允更形踴躍或賠項過多酌分成數趕緊完納經此次訓諭之後如再仍前玩視必將該督撫重懲或各屬員不

肯實力籌解卽著指名嚴參該督撫具有天良當不至仍前玩泄也○乙酉諭前因戶部奏籌備庫款一摺當派宗人府大學士軍機大臣會同戶部妥議茲據王大臣等議定准駁並仍會同戶部另議章程五條具奏朕詳加披閱尙屬周妥國家承平日久涵濡德澤務爲寬厚漸至廢弛歷久相沿已非一日若不大加整頓興利除弊則官玩法而民受害政事何由得舉該王大臣等所議數條或循成憲或順輿情無非就自然之利斟酌損益鹽務乃裕課之源生齒日繁理應轉運不竭乃見在長蘆山東鹽務疲累已極特派定郡王載銓等分別覈辦該王大臣務當博採輿論實力講求除有數處已經行之有效暫無庸更易外其餘應如何變計俾裕國便民之處著體察情形悉心妥辦至各省錢糧江蘇浙江河南山東福建四川等省俱辦清查已立期限惟條分縷析造冊報

部恐遲延時日著各直省督撫趕緊先造四柱清冊一分每省各以一府爲一冊統以文到之日限八箇月辦齊其短少之項已有數目從何支飾各該督撫惟應迅籌彌補章程不得輾轉耽延終歸無著造冊完竣咨明戶部隨到隨卽咨報軍機處存記不拘何時請旨順派欽差前往各府縣抽查從前虧短之數業經設法分別彌補追賠各該員已有應得罪名處分朕必寬其既往不置重典但報部之後水落石出若續經欽差查出虧短立即訊明執法從事決不寬貸其八箇月以內本已到限者毋庸因此另展所有從前奏請展限覈辦原因繕造細底清冊仍應逐細辦理屆期報部以憑覈對漕糧本有折色之條但恐州縣於舊章之外藉詞增添與其受追呼而肥劣員之橐不若減價值而作惟正之供著各該督撫體察各屬情形酌量應折幾成卽以此銀循照成案分於

北省各處豐收地方購買米麥或招商由海運抵津至舊緩帶徵
漕糧與本年秋收無涉屆啓徵之年無論正米耗米盡數改爲折
色解交部庫所有一切隨漕應徵旗丁行月贈耗等米及交倉席
木等項自應按照緩漕數目計算一併改折解部如州縣借詞浮
折卽行嚴參至河工浮冒之弊人所共知本年已明降諭旨著戶
部存記除例應發給銀兩外絲毫不准再撥自當懍遵計每年所
撥銀兩儻力節浮費儘敷辦工如果該廳員等於例領正價之外
並未絲毫糜帑三汛之後准該河督優加保舉嗣後河督處分仍
照舊例分別漫口罰俸決口降留辦理毋庸離任其失事專汛廳
弁從重治罪以專責成而杜挾制並酌添該河督養廉以資辦公
江南河道總督共發給銀一萬二千兩河東河道總督共發給銀
一萬兩優與正所以杜其濫取各廳員欠缺甚多著兩江總督山

東河南巡撫會同該河督等酌議裁撤至開礦之舉以天地自然之利還之天下仍是藏富於民如果地方官辦理得宜何至藉口於人眾易聚難散因噎而廢食著四川雲貴兩廣江西各督撫於所屬境內確切查勘廣爲曉諭其餘各省督撫亦著留心訪查如有苗旺之區酌量開採斷不准畏難苟安託詞觀望儻游移不辦朕不難派員前往履勘如果不便於民或開採之後弊多利少亦准奏明停止至於官辦民辦商辦其應如何統轄彈壓稽查之處朕亦不爲遙制惟在該督撫等各就地方情形熟商妥議定立章程具奏總之有治人無治法窮變通久全在因時制宜綜此數端除實有不便於民者准該督撫奏明外其餘令在必行諒不敢莠言亂政如果該大吏等振刷精神痛除錮習小廉大法未有爲其事而無其功者卽令收效稍遲亦絕無絲毫掣克病民也爾百寮

共勉之苟能膺朕之賞而毋干朕之法朕甚慰焉將此通諭中外
知之○乙未免湖北民欠修隄費銀六十萬兩○己亥李德以病
免以程煥采爲江蘇布政使楊文定爲湖南按察使由廣東惠潮嘉道遷○
是月給江西德化等二十縣水災口糧貸湖南提標及常德等協
營災區兵餉蠲緩江蘇泰州等七十七州廳縣衛兩淮呂泗等二
十場江西德化等二十二縣直隸安州等六州縣水災新舊額賦
緩徵山東濟甯等二十七州縣衛河南睢州等五十州縣甘肅涇
州等二十二州縣災歉新舊額賦展緩陝西葭州等五州縣積欠
逋賦

十二月丙午 上詣 大高殿祈雪○庚戌諭原任江南提督陳
化成爲國捐軀其被害甚烈本日兵部將伊子帶領引見朕追念
遺忠不勝悼惜陳化成之子陳廷芳著遇有福建水師都司缺出

卽行補用毋庸學習○辛亥諭載銓等奏遵旨會查長蘆鹽務酌改章程開單呈覽一摺長蘆鹽務疲敝已久疊次整頓調劑總無起色經朕特派王大臣前往會同查辦茲據確切查覈臚列條款會奏自應因時變通俯如所請試行辦理所有長蘆懸岸四十四處之內河南懸岸二十州縣著盡改票鹽卽倣照淮北成案先課後引直隸所懸之二十四州縣著予限半年責令各州縣招商招販一律整理儻商販無人卽責成各州縣自行領運或由鹽政遴員官運以濟民食卽責成訥爾經額會同崇綸實心覈辦不得畏難苟安此後商欲改票票欲改商皆可隨時體察施行至該處各項支銷浮費著照議停減其引地文武各衙門官役相沿陋規既往不咎著通行嗣後永遠裁汰又每年應完內外帑利銀三十萬一千零著按額引均攤無論行引行課悉按此數同正課一併覈

計徵收分款支解遇閏照例加增並此後引鹽每引著准其加斤
免課每斤准其減價敵私皆照所議之數辦理至道光二十七年
引課奏銷於二十九年春閒領運完竣後仍於五月內奏銷此後
按年照辦著免其提早一月以顧春運而免貽誤其各項積欠銀
二千三百四十三萬一千四百餘兩著自二十九年按引分攤
徵收解部儻有拖欠由戶部指參再緝私章程兵役不如商巡得
力嗣後著復商巡舊規以杜偷漏而節糜費凡此數端皆事屬可
行而恤商不爲不至歷年因循玩誤遂致帑本國課支絀不堪經
此整理之後訥爾經額惟當會同鹽政崇綸實力奉行認真妥辦
務期積弊全除日有起色該督等具有天良諒不至爲官吏欺蒙
暗受其把持而不知也○以吉明朱嶠俱爲內閣學士兼禮部侍
郎銜吉明由葉爾羌參贊大臣
朱嶠由通政使司副使遷○甲寅 上復詣 大高殿祈雪

○乙卯召劉喜海來京以汪本銓署浙江布政使由宗人府○召

周開麒來京調蔣蔚遠為浙江按察使以黃宗漢為山東按察使

由廣東雷○庚申以潘世恩年登八秩賞其孫祖蔭舉人並頒

御書扁聯福壽字珍玩文綺○辛酉 上詣 天神壇祈雪○壬

戌諭耆英朱鳳標徐澤醇奏查出歷任運司出借銀兩請照數賠

繳等語運庫存貯雜款各有一定之用見經耆英等查出歷任運

司出借銀兩至七萬三千九百三十餘兩之多雖事屬因公確有

案據惟自道光二十年後迄今並未歸款歷任相沿流弊滋甚著

卽責成各前運司如數賠繳文綸應賠銀一千一百五十五兩零

何其興應賠銀三萬六千二百三十六兩零王鎮應賠銀二百十

三兩零方濤應賠銀二兩零陳士枚應賠銀三萬三千一百九十

三兩零沈拱辰應賠銀一千六百二十五兩零韋德成應賠銀一

千五百九兩零其一千兩以上者予限三箇月三萬兩以上者予
限一年均於文到日起限其業經身故者著落子孫賠繳儻逾限
不完著戶部及山東巡撫查明參辦嗣後運庫錢糧務須覈實存
貯概不准擅行借支以杜弊混○諭書英朱鳳標奏遵查東商面
封公費並將收受程儀節壽銀兩各員開單呈覽一摺山東省面
封公費銀兩向係商捐商用見據耆英等查明歷任支銷之處實
係藉資辦公所有歷任巡撫運使支銷公費著毋庸議惟程儀節
壽名目卑鄙貪婪嗣後著卽永遠革除不准仍蹈錮習其收受各
員本應一槩懲辦姑念相沿已久且係在面封項下支銷與需索
有閒此次暫行從寬分別辦理所有收受程儀之前任巡撫署巡
撫經額布麟魁王篤梁寶常崇恩均著交部議處所受銀兩著照
數罰賠其收受節壽等項之前任運使署運使文綸寶清王庭蘭

何其興王鎮陳功陳士枚徐經沈拱辰韋德成均著交部嚴加議處所受銀兩著照數加倍罰賠已故者該部查明各籍飭令其子孫代賠均於交到之日勒限一年完繳如逾限不完該部隨時參辦刑部侍郎前署山東巡撫陳孚恩於公費等項一槩不收清正可嘉之至著加恩賞給頭品頂帶在紫禁城騎馬以示獎勵旋頒御書清正良臣扁額○乙丑諭前據耆英等奏遵查東商面封公費並程儀節壽等名目當將收受之歷任山東巡撫運使及署任各員交部分別議處嚴議茲據該部察議具奏該員等身膺重寄輒於鹽務陋規相沿收受均屬貪鄙無恥自應分別示懲除已故各員賠項仍著落子孫追繳其處分毋庸議外經額布麟魁王篤梁寶常覺羅崇恩均著照部議降三級調用不准抵銷王篤梁寶常均有革職留任處分著卽照例革職寶清王庭蘭何其興陳

士枚徐經沈拱辰韋德功均著照部議革職○以成剛爲禮部尙

書柏葭爲左都御史

由戶部左侍郎遷

○丙寅轉全慶爲刑部左侍郎以

恆春爲刑部右侍郎

由陝西布政使遷

○轉阿靈阿爲戶部左侍郎調福

濟爲戶部右侍郎明訓爲吏部右侍郎靈桂爲工部右侍郎以恒

毓爲盛京兵部侍郎

由左副都御史遷

○以張祥河爲陝西巡撫

由甘肅布政使

遷

○丁卯以常大瀄爲陝西布政使

由湖北按察使遷

○戊辰以恆福爲

直隸按察使

由口北道遷

駱秉章爲湖北按察使

由庶子遷

○是月加賑直

隸通州等十四州縣災民緩徵浙江仁和等三十一縣衛暨青村

等五場直隸通州等十四州縣被災新舊正雜額賦展緩山東章

邱齊東二縣直隸霸州等二十六州縣災歉通賦○是歲朝鮮琉

球暹羅越南入貢○會計天下民數除臺灣府屬淡水等七廳縣

穀數除福建省未報外各省通共大小男婦四萬二千六百七十

三萬七千一十六名口存倉米穀二千九百二十七萬四千二百八十四石九斗三升四勺

東華續錄

道光五十九

臣王先謙敬編

臣周瀚蕃恭校

道光二十九年己酉春正月丙戌諭朕於謁

舉行今春屆應祇謁 東陵本擬擇吉前往以伸追慕之忱惟上

年京東一帶地方被水歉收蹕路所經不能不藉資民力雖節經

降旨加恩蠲緩賑恤仍恐民困未蘇益以差徭未免更形拮据所

有此次謁 陵典禮著暫停前往○辛卯諭激揚大典覈實爲先

滿漢諸臣有能精勤任事不顧嫌怨者允宜甄敘或年力已衰或

無足錄取者亦難姑息茲屆京察之期吏部將內外諸臣開單題

請朕詳加酌覈大學士穆彰阿潘世恩戶部尙書賽尙阿祁雋藻

刑部侍郎陳孚恩贊襄庶政矢慎矢勤而潘世恩年逾八旬精神

強固尤屬罕遇朕甚嘉焉大學士耆英數年以來總督任內諸臻妥協直隸總督訥爾經額久任畿疆克盡職守毫無懈弛均著加恩交部議敘禮部侍郎馮芝兵部侍郎德厚年力漸衰均著原品休致餘著照舊供職○轉吳鍾駿爲禮部左侍郎以曾國藩爲禮部右侍郎由內閣學士遷○轉瑞常爲兵部左侍郎調道慶爲兵部右侍郎以景瀄爲盛京工部侍郎由副都統遷○丙申修湖北省城江隄並荊州府萬城大隄○戊戌諭戶部奏州縣經徵錢糧已徵未解請飭嚴催等語錢糧爲國家正供應徵應解自宜按限報部豈容掩飾懸宕乃各省奏銷多不足額經該部據冊指駁再四咨查並降旨嚴飭各督撫認真訪察據實參奏而各省於已徵未解剋期可以報撥之款竟未查出一案參及一人是視飭催爲具文毫無儆畏實屬任意延玩地丁正項旣已徵之於民卽爲見存之款何難

登時起解總因不肖州縣私肥囊橐任意侵那各該上司代爲彌縫隱忍不奏迫嚴行飭催猶以民欠未完交代未清爲口實見計各省冊報未完地丁銀尙有八百六十餘萬兩之多若不及早清釐伊於胡底前以清查庫款降旨以八箇月爲限著各督撫督同藩司按照該部疊次單開認真釐剔其已徵未解各款務於八箇月限內埽數提解迅速報撥儻查有侵虧等弊立即嚴參從重究辦庶懲一可以儆百各督撫經朕特簡重膺疆寄宜如何激發天良力圖整頓地丁正項卽令按期徵解亦屬分所應爲乃以分內之事聽州縣任意枝梧疊經飭催仍復漠不關心無非爲規避督催不力處分豈封疆大吏竟如是居心耶經此次曉諭之後各督撫務宜認真整飭破除情面斷不可仍令不肖州縣藉詞延宕如已徵各款仍有未解一經查出除將各州縣從重治罪外並將各

督撫一併嚴處決不寬貸朕言出法隨各督撫其懷之勉之○是月加賑安徽無爲等十六州縣衛水災給湖南澧州等六州縣安徽和州等十三州縣水災口糧貸江西南昌等十二縣湖南澧州等六州縣水災籽種緩徵山東臨清等三十七州縣衛上忙額賦浙江仁和等十三縣逋賦

二月庚子朔日有食之○辛丑臺灣北路各廳縣被水地震命劉韻珂飭屬查勘撫恤○丙午李星沅奏查江蘇賑務並運河南米麥協濟得旨覈實妥辦貧劣官吏不可倖免一人困苦災黎不可輕拋一命庶稍贖朕嘗卿等亦當獲福矣勉之毋忽○甲寅諭前據耆英奏敬陳管見一摺當交大學士軍機大臣會同該部覈議茲據會議章程並嚴定處分分別治罪各省地丁銀兩國家正課攸關乃已徵未解之款不可數計不肯州縣每遇有覃恩年分辜

混災緩串通請免貪巧可恨嗣後有以完作欠恣意侵那膽敢蒙
混請免者悉照大學士等新議章程治罪斷不稍存寬貸見在勒
限八箇月清查各督撫大吏自應飭屬認真稽覈徵存者卽時解
司已解者剋期奏報如再有屬員弊混司庫通融情事卽將該州
縣同庫書解交刑部嚴審確情擬罪並將該藩司道府等嚴議徇
隱之督撫從重議處至地丁錢糧截數限期例不畫一應如所議
除廣東應於次年正月雲貴應於次年三月截數外餘俱令於十
二月底截清已未完數目造報按限於次年開印後具奏不得遲
至奏銷屆期始行奏報經此次嚴定章程之後該督撫府尹如不
能督率所屬力圖整頓或明知屬員等以官欠作民欠並將已徵
之款延不報解被人參奏或朕別有訪聞定將該督撫等加以嚴
懲試問能當此重咎否耶懷之○丙辰諭內閣學士載增於召見

時輒敢以家事冒昧陳奏已屬膽大妄爲復將妄奏之語向伊家內之人洩漏見經軍機大臣傳訊明白載增著與伊弟載堪均革去內閣學士退出乾清門所管一切差使全行革退均加恩賞給頭等侍衛在大門上行走○諭軍機大臣等琦善裕誠奏野番滋事一摺四川中瞻對野番工布朗結膽敢出巢滋事各土司俱被搶掠殺斃民人殊屬目無法紀外番狡逞自相蠶食原可置之不問惟恃其兇頑不惟占去各土司地方並欲侵占裏塘爲梗塞大路之計經該督出示曉諭該野番仍負固不服似此兇頑自應及早撲滅毋令養癰貽患琦善見在馳往中瞻對督率弁兵相機妥辦務當迅速剿滅殲厥渠魁勿令蔓延肆擾至前交該督赴滇審辦之案見已明降諭旨改派裕誠辦理所有此案原委及寄信諭旨該督檢齊移交該將軍查照遵辦可也○以何裕誠爲內閣學

士兼禮部侍郎銜由題書元爲左副都御史由太常寺題書○丁卯調溫
予巽爲甘肅布政使龔裕爲直隸布政使○是月貸江蘇災區京
左等八營一季兵餉

三月壬申以故貝勒縣偃子奕縉降襲貝子○壬午兩江總督李
星沅奏南漕改折戶部例定價值爲數甚輕州縣私收折色多則
徵收不易少則採買不足且銀價時有長落年景時有不齊不肖
州縣顯開浮勒之端不法吏胥暗啓訛索之漸種種窒礙變而難
通得旨原議王大臣等會同戶部議奏○乙酉以和色本爲內閣
學士兼禮部侍郎銜由題書○丁亥江蘇巡撫陸建瀛奏南漕改徵
折色諸多未便敬謹瀝陳一原議改收折色卽以其銀分於河南
陝西奉天豐收地方購買米麥或招商由海運津等語查定例折
米一石納銀一兩其多者亦不過一兩四五錢無論河南等省豐

歉不可爲常卽以招商海運而論二十七年成案每米一石給銀二兩四錢或六錢不等統計大局入不敷出當此國用支絀之時何能更爲買米籌款一原議改收折色不惟經費有補且可以甦東南官民之困等語查招商採買例價不敷勢必酌增折價過重民何以堪民力不支必多積欠民欠未完必責官墊官墊無償必添那移江蘇數十年來均以墊漕而致虧今又加以折漕將另開一虧空之門恐民困未甦而於國帑大局有礙一原議南漕全折京城米價必昂請酌折成數等語查酌折成數辦理參差幸而年穀豐登折收三成兩成尙徵七八成本色萬一歲事不齊則減米一石卽少米一石減折色一分卽短採買一分而不肖官吏又多不可思議之處久之銀短而米更短於京師民食關係匪淺得旨原議王大臣會同該部議奏○己丑修湖北襄陽老龍石隄○庚

眞諭軍機大臣等本日據徐廣縉奏熟籌進城一事實屬萬不可
行又據葉名琛穆特恩等奏遵旨嚴防並加意撫戢兵民各一摺
又據葉名琛片奏進城有害無利斷難隱忍坐視等語覽奏均悉
進城之約在當日本係一時羈縻見在該酋堅執前約該督等前
奏親赴虎門面晤情形於進城究竟可行與否未能縷晰陳明是
以朕前經降旨暫准入城一遊期於少生枝節若如該督等此次
所陳婉阻之未必遽開邊釁輕許之必至立啓兵端層層奏明朕
始悉其底蘊自應照該督等所議酌辦見在該省兵民互相保衛
共有十萬之眾是眾志成城自當勸其同仇何可使之解體且據
葉名琛穆特恩等奏稱內河外海見飭一律嚴防不至稍有疏虞
著徐廣縉等卽就見辦情形隨時體察務當固結民心激揚士氣
萬不可稍有疏失方臻妥善該督等同心敵愾深堪嘉尙朕絕不

爲遙制儻使沿海各省皆能如此足食足兵朕無憂矣○以瑞麟

爲內閣學士兼禮部侍郎銜

由太常寺少卿遷

○乙未裁山東泉河通判

一河南歸河通判一守備一○戊戌諭前經降旨無庸截取之湖

南舉人唐懋著照禮部舊例給予八品京銜嗣後有舉人不准截

取者著照此辦理○廣東陽山英德等縣匪徒滋事命徐廣縉等

勦辦○是月緩徵江蘇邳州等二十六州縣衛通賦

夏四月己亥朔徐廣縉葉名琛奏進城之不可行已備文照會並

探知香港復到有兵船及火輪船隻且有雇坐小艇分往海口測

水探路情事所有虎門外海各礮臺見經調集香山等營兵丁並

雇募壯勇分飭嚴防見在城內居民恨洋人切骨惟恐其不受創

文翰似有轉圜之意得旨嘉勉○壬寅李星沅以病免以陸建瀛

爲兩江總督調傅繩勛爲江蘇巡撫以費開綬爲江西巡撫

由布政使

遷

○癸卯諭吉明德齡奏邊外安靜情形並在逃回子全數投回

一摺喀什噶爾英吉沙爾二城在逃回子一千餘名口見經全數投回雖在一年限外所有原業田產加恩仍准給還以示體恤並

著該城大使督飭該阿奇木伯克等妥爲安置勿令滋生事端○

諭軍機大臣等吉明德齡奏霍罕收取卡外租稅被布嚕特將該夷目殺害潛逃等語覽奏均悉卡外蠻觸相爭事所恒有撫馭之

道但當處以鎮靜聽其自然毋許過問致啓曉漬該大臣等既經

密飭三城暗加防範自應將各城滿漢防兵認真訓練軍械礮火

隨時檢齊務須餉足兵精時存有備無患之意仍不時妥飭員弁

偵探該夷動靜據實稟報毋許貪功多事○甲辰以陶樑爲江西

布政使春熙爲山西按察使

由甘肅甘涼道遷

○乙巳以山東洋盜搶掠

申諭徐澤醇飭屬按拏沿海村塢盜藪○丙午諭前據李星沅陸

建瀛先後具奏南漕改折流弊易滋諸多窒礙各等語當交原奏
王大臣等會部議奏茲據悉心覈議具奏應如該督撫所請毋庸
議折本日適據耆英奏到南漕暫緩改折一摺折漕之議原因外
省州縣折色過重徒充私橐轉紬正供因力求變通令各就往年
徵糧實數酌減徵收期於興利除弊既據該督等以種種格礙難
行分晰陳奏惟恐不肖州縣借折色之名抑勒倍取是便民之舉
轉致病民亦不可不防其漸所有各省漕糧著准其仍照舊章辦
理毋庸分成議折但變通既滋弊竇守舊宜復成規漕糧爲天庾
正供不容顆粒短絀封疆大吏尤當激發天良隨時整頓嗣後務
須實力徵收全漕兌運儻各屬有捏災註荒及官吏私徵中飽州
縣浮收勒折等弊必應嚴加釐剔其不肖州縣肆無忌憚如敢浮
收勒折病民肥己一經查出卽著指名嚴參治罪毋稍姑容該督

上司儻有意存徇庇者著一併從嚴參辦經此次申諭之後如該督撫等仍漫不經心諉之於弊難周察相率因循或不竭力思辦全漕任聽屬員捏報災歉朕惟有執法從事恐該督撫等不能當此重咎也○丁未徐廣縉葉名琛奏英人因省城防衛森嚴並經紳士公函勸導深知眾怒難犯又因洋商停止貿易大受牽制不敢進城其計已決得旨所辦可嘉之至朕心甚慰如此棘手之事卿不動聲色使彼自屈較之軍功尤堪嘉尚又奏呈廣東紳士公致文翰信彙批遠勝十萬之師皆卿胸中之錦繡幹國之良謀嘉悅之懷筆難盡述也○己酉以前任禮部侍郎杜堦重赴鹿鳴賞頭品頂帶並太子太保銜○癸丑賞徐廣縉子爵世襲雙眼花翎葉名琛男爵世襲花翎予穆特恩烏蘭泰托恩東額洪名香祥麟照軍功例優敘餘升賞有差○諭我粵東百姓素稱驍勇乃近年

深明大義有勇知方固由化導之神亦係天性之厚朕念其翊戴之功能無惻然有動於中乎若徐廣縉葉名琛宣布朕言俾家喻戶曉益勵急公向上之心共享樂業安居之福其應如何獎勵並分別給予扁額之處著該督等第其勞勩錫以光榮毋稍屯膏以慰朕意○丙辰撥四川撫邊屯麥二千石接濟崇化屯糧○丁巳硃諭軍機大臣等本日又獲甘霖地面一定涇滑潘世恩可無庸進慎德堂雖有扶掖之資難紓眷念之意諸卿等於登下扁舟亦當在意○庚申諭徐廣縉子爵葉名琛男爵均著准其以一等世襲

閏四月辛未鍾祥卒賞顏以煥三品頂帶署河東河道總督

由江
南淮

海道

○癸酉陸費瑔丁憂調趙炳言爲湖南巡撫以羅繞典爲湖

北巡撫駱秉章爲貴州布政使椿壽爲湖北按察使

由山西歸
按道遷

○

甲戌江西九江關監督士魁奏製造圓琢藝器名目件數得旨句
除者十六項自本年永停燒造此冊發往九江關監督衙門作爲
交代從前按節令按花文之鄙例再不能除些小事尙然如是可
恨可惡之至總之有用之物不嫌其多繁文世俗必當力屏初不
在數十種藝器也○辛巳諭琦善奏親督漢土官兵進剿中贍對
野番大獲勝仗一摺此次中贍對野番工布朗結出巢滋事將各
土司印信號紙土地人民肆行搶掠復欲侵占裏塘勢將梗塞通
藏大路經琦善統帶官兵督飭將弁土司等行抵該處該野番頭
目膽敢帶領賊番前來衝突我兵開礮轟擊槍矛齊施傷斃賊目
二名及羣匪二百餘人餘匪逃竄復追殺無數並奪獲牛馬甚多
賊目噶羅布恰必阿索均落崖身死見仍詳探路徑籌充糧餉以
期搗穴窮搜所辦尙好琦善調度有方著交部議敘所有此次進

勦之將弁等並著擇其尤爲出力者酌量保奏候朕施恩毋許冒濫○癸巳申定浙江鹽務章程○甲午諭軍機大臣等琦善奏官兵續獲勝仗攻破礮卡奪占隘口一摺覽奏均悉此次進勦中瞻對野番官兵甫抵該處卽已大獲勝仗茲復據奏本月初二日子時復遴選精卒分路攻擊數日之內攻毀礮卡十餘處奪占隘口四處殲斃賊番數百人所辦甚好乘此兵力精銳正可一鼓作氣搗穴擒渠惟賊巢周圍皆係戰牆堵塞且礮塞堅固必須稟度礮力足以相及方期施放有準奪隘摧堅該督惟當審度形勢妥協辦理務將糧餉軍械籌備齊全並詳探路徑剋日進攻掃除羣醜俾諸番望風懾服毋稍疏虞

五月癸卯徐廣縉奏謝賞子爵花翎恩得旨運籌之功不亞於斬將舉旗使將士用命商民一心堂堂正正攘外安內朕慶得人必

當加賞何爲過焉○丙午諭季芝昌吳文鎔奏遵旨會查浙江省各屬倉庫那墊數目請將知縣先行革職勒限完繳一摺浙江省各屬庫款正項動墊銀數累萬盈千雖用款悉出因公但墊數愈多卽虧數愈鉅亟應嚴辦以示懲儆所有那墊銀三萬兩以上之浙江前任富陽縣知縣楊燦基嘉興縣知縣仲來秀水縣知縣賈椿齡嘉善縣知縣劉秀鈺俱著先行革職勒限本年完繳倘逾限無完卽將該員等拏問監追查鈔備抵至已故烏程縣知縣馬受昌那墊銀數亦在三萬兩以上著卽著落該故員家屬勒限一年完繳俟限滿時再行分別查辦○諭軍機大臣等本日據季芝昌吳文鎔奏清查浙省倉庫歷年那墊銀穀各數並擇尤參辦一摺已明降諭旨將那數最多之前任富陽縣知縣楊燦基等四員革職勒繳並將經徵九載全完之於潛縣知縣曾積堂從優鼓勵矣

浙江省各屬倉庫自道光二年清查至今歷任那墊正雜錢糧並
漕南等米以銀作價見據查明共銀二百八十四萬六千八百餘
兩倉穀一百十萬九千五百餘石米三千餘石之多實屬不成事
體究其致虧之處雖由近年銀價日貴漕費日增及塘工兵差各
案不敷捐賠以致那移公項墊補虧缺日甚一日而不肖州縣藉
口因公侵吞入己者亦恐不少總由該管上司不肯隨時認真稽
覈存見好屬員之見任其蒙混詳報錮習相沿實堪痛恨季芝昌
派辦清查是其專責吳文鎔到任未久無所用其回護著將歷任
巡撫藩司上屆清查以後確切查明何人任內那墊數目最多並
有無偏袒屬員任聽蒙混情弊秉公確覈分別輕重據實參奏不
准稍有徇隱汪本銓經朕特簡見經實授藩司所有前任各藩司
顛預疲玩之處並著查明據實揭參毋稍瞻顧○實授汪本銓浙

江布政使○戊申賞鄭國鴻孫舉人恬七品小京官○己酉諭林則徐程喬采奏夷匪焚掠各寨勦辦情形一摺所辦甚好上年雲南騰越廳卡外野夷滋擾糾夥掠擄居民經明光隘土守備左大雄管帶練勇出卡勦辦殲斃夷匪多名該匪等畏威悔罪立誓輸誠洵能遠振軍威又安邊地左大雄著加恩賞給義勇巴圖魯名號以示激勸騰越鎮總兵拴住迪西道王發越永昌府知府張亮基署騰越廳同知霑益州知州鄧垠籌商軍務督率有方均著交部從優議敘六品軍功頂帶練總董大文擊賊陣亡著照土千總例賜卹傷亡練丁均著交部照例議卹○庚戌諭琦善奏中瞻對野番悔罪投誠並附近中瞻對之卓巴塞爾塔野番傾心效順各一摺又另片奏在事出力人員可否酌保等語此次中瞻對野番出巢滋事經琦善督兵征勦疊獲勝仗直抵巢穴該野番工布朗

結等震懾軍威遞結投誠情願將所奪地土人民退還各土司照舊各安住牧自應寬其既往俾得向化輸忱著仍賞給工布朗結六品長官司虛銜以昭勸勉至卓巴塞爾塔野番旺慶所管地方與中瞻對相距甚近亦經該督派令護理東科長官司衮噶設法開導該野番來營投誠願備徵調其歸順亦出至誠旺慶著賞給土守備職銜並賞帶花翎琦善督兵遠涉迅速蕲功著交部從優議敘所有在事文武員弁及各路土司等均屬著有微勞著該督擇其尤爲出力者酌量保奏候朕施恩毋許冒濫○癸丑以青磨爲內閣學士兼禮部侍郎銜由太常寺卿遷○戊午兩江總督陸建瀛奏近日兩淮嵯務疲敝已極推原其故總由私鹽充斥官鹽昂貴商人成本過重綱運滯銷欲減價以求銷而商本已折欲願價以保商而官銷益絀見飭運司但明倫嚴飭辦事商人趕緊捆運並嚴

禁官員書吏積壓需索等弊此急則治標之計若通盤籌畫欲求萬全非確有十分把握斷不敢輕於一試得旨竭盡心力爲之朕惟卿是望○己未諭陳孚恩福濟奏訊出巡撫收受餽送銀兩請旨革訊並將狡供之知縣革審一摺山西巡撫王兆琛汾陽縣知縣曹文錦山陰縣知縣金作節河津縣知縣程震佑著一併革職拏問交陳孚恩福濟嚴行審訊○以季芝昌爲山西巡撫朱嶠爲倉場侍郎學士內閣○庚申諭劉韻珂吳文鎔奏攻勦漁山盜匪先後籌辦情形一摺浙洋漁山盜匪依爲巢穴見經該督等督飭鎮道雇勇添船復飛咨水師提督寶振彪統師兼往先後擒斬多犯沈毀多船並將巢穴門戶分別毀除填塞洵足示震懾而昭炯戒惟漁山一島孤懸海外若不立法稽查嚴行申禁難保不日久又成盜藪著該督等卽嚴飭黃巖鎮於該鎮所屬中左右三營內每

月輪派遊擊一員親率本營舟師前往巡查並著該鎮於遊擊輪
巡一周後親往覆查分別具結總期漁山盜窟搗除淨盡不准再
有人迹往來以副朕綏靖海疆至意○辛酉以程庭桂署山東按
察使由通政使署○丙寅徐廣縉等奏查洋人之來中國原爲通商內
地奸民自蹈貪頑爲其所餌希圖暗中聳惑更可倚勢自肥見訪
獲新甯縣屬私通外國潛遞書信之李象經查閱該犯信彙悖謬
絕倫行同叛逆例應斬決已於審明後卽行正法以昭炯戒下部
知之○是月貸山東滕縣雹災倉穀並緩徵鄒縣滕縣新舊正雜
額賦

六月乙亥諭前據御史楊彤如奏參山西巡撫王兆琛歷任聲名
平常賊款炳著及各州縣餽送營求並因辦差釀命等情一摺當
交陳孚恩福濟馳往查辦旋據奏見訊情形已降旨將王兆琛等

一併革拏嚴訊茲復據奏訊明王兆琛於鹽務奏裁公費抵充活引正課之後輒因辦公不敷得受商人節規銀一萬四千餘兩又失察巡捕家人婪索規禮門包及轎役滋事復收用汾陽霍州兩處紅封銀兩種種貪鄙營私實屬孤恩溺職已革知州楊樹年於陽曲縣任內索借王凝一銀一萬餘兩雖訊與王躋堂家命案無涉惟以見任職官借貸部民財物爲數較多又餽送該革撫紅封門包銀兩亦屬卑鄙無恥王兆琛楊樹年均著兆那蘇圖派委文武幹員押解來京交軍機大臣會同刑部覆審定擬具奏至山西巡撫兼管鹽政向有河東鹽務辦公銀兩查係前任巡撫吳其濬因商力疲敝奏請裁革一萬兩吳其濬雖已身故而其潔已奉公洵不愧爲封疆大臣著該省巡撫查明該故員見有子孫幾人查明具奏卽已革巡撫梁萼涵前雖因案發往軍臺而咎止失察伊

弟撞騙多贓其於鹽務派商並無徇情受賄情事見又查出交城縣貢餘皮張亦經該革撫永遠裁汰以視王兆琛恣意貪婪相去何啻天壤梁萼涵著卽釋放回籍並賞給六品頂帶以爲廉正自愛者勸○丙子諭徐廣縉葉名琛奏戕官案內匪徒悉數就擒一摺廣東陽山英德等縣匪徒聚眾戕官行同叛逆經該督等飛咨署提督祥麟並札調鎮將選帶各路兵丁分路進剿並飭運司徐有王馳往會辦先後獲犯五百五十二名首要均已就擒見在地方安靜官兵盡撤歸伍辦理實屬迅速徐廣縉葉名琛祥麟徐有王均著交部從優議敘該地方文武隨同接捕功過尙足相抵所有失察職名免其開參在事員弁著該督等擇其尤爲出力者酌量保奏候朕施恩○以江蘇蘇州等府水災命傅繩勛飭屬撫恤並免各關商船米稅○戊寅諭德誠吳鍾駿奏遵議防查轉運漕

糧積弊一摺向例抽查漕糧御史分駐大通橋及各閘地方輪替防查嗣經歸併大通橋一處著仍照舊章一在大通橋抽查掣量一赴各閘稽查偷漏分別防查弊端以符定制○庚辰命陸建瀛飭發倉穀庫銀並截留關稅備江蘇水災賑需○改江南文鄉試於九月舉行武鄉試於來年三月舉行○辛巳以安徽水災命王植等留款備賑並免各關商船米稅○壬午予宋儒謝良佐從祀文廟○癸未諭今夏以來江浙安徽湖北等省皆因雨多水漲各屬漫淹較廣災民蕩析離居嗷嗷待哺每一覽奏焦慮殊深見經該督撫及時籌辦賑撫凡有可以恤民之處自無不盡心經理力圖保全惟是災區既寬需費甚鉅雖經官民等量力捐助賑恤窮黎尙恐未能周徧當此哀鴻滿目朕復何忍稍爲屯膏致民困未能卽蘇除江蘇省前已奏明動款安徽省亦請留款備賑並均

免商販米稅外其浙江湖北等省被災情形皆同所有藩關各庫銀兩槩准該督撫酌留備賑商販米船亦准一體免稅該督撫等其其體朕意務各遴委賢員認真查辦總期實惠均霑如查有浮冒剋扣等弊立即嚴參重懲斷不可使有一夫失所以副朕念切民依恩膏速沛至意○甲申諭吳文鎔奏籌運米糧以濟民食一摺本年浙江災區寬廣糧價昂貴小民乏食堪虞除外江內河商運米糧赴浙售賣者經過各關昨已降旨均免納稅外其福建省如何招商販運臺米山東省如何招商販運小米雜糧等項並粵東洋米如何買運赴浙均著各該督撫等體察情形妥速辦理務期災黎均霑實惠而奸商不至居奇用副朕籌裕民食至意○諭吳文鎔奏遇災恐懼懇予罷斥一摺所奏冒昧糊塗膽大之至國家設官分職責重牧民已當其任無論時之難易事之能否皆當

盡心竭力豈能任意譏卸况巡撫統轄全省疆寄攸關值此天災流行民生窮蹙宜如何設法安撫用以下蘇民困上紓朕憂方爲無忝厥職今吳文鎔以災患異常輒請迅賜罷斥另簡賢能是徒知引咎而不思盡職時值艱難使身任封圻者皆如吳文鎔居心竟置億萬災黎於弗顧將求牧與芻之謂何耶似此迂腐無能率意上瀆卽立予罷斥亦屬咎所應得惟當辦災棘手之際轉令置身事外恐啓巧避之漸吳文鎔著革去頂帶暫留浙江巡撫之任責令認真籌辦災賑如能不懈勞怨辦理妥速尙可稍贖僇尤儻復不知振作查辦竟無成效致災民轉徙溝壑必當重治其罪朕言出法隨斷不能稍從寬貸也懍之慎之○改浙江文鄉試於九月舉行○以車克慎爲內閣學士兼禮部侍郎銜調縣○乙酉諭軍機大臣等楊以增奏洪湖及運河水勢積漲酌籌分減情形一

招又另片奏早晚潮退水消仍當堅守車邏壩等語覽奏均悉本年入夏以來江南陰雨連綿淮源既旺湖水亦有長無消高堰誌椿見已積存至一丈九尺有餘情形實屬危險權其輕重自須將車邏壩先行啓放冀可減漲保隄惟下河一帶民田尙賴秋收稍資接濟如能守至秋成以後再行啓洩庶民困可蘇而隄工亦資穩固方爲計出萬全然水勢消長難以逆料儻至無可如何之時又豈可稍涉拘泥致有漫口之虞該河督惟當隨時體察相機籌辦得守且守應放卽放固不可孟浪以病民尤不可拘墟以誤事是爲至要○戊子諭前因清查浙省倉庫虧數較多降旨著季芝昌吳文鎔確查歷任撫藩有無偏袒屬員任聽虧那情弊茲據查明道光二十年以前雖有那移尙不甚鉅二十一年間兵差絡繹支應紛繁各屬那缺有因卽上司處分亦宜量加寬免惟自二

十三四年至二十五六七等年覈計徵存未解銀自三四十萬兩
遞年增加至六七十萬不等其閒尤以二十六年爲最甚雖由銀
價日增幫費日重以致那墊愈多而似此年甚一年漫無收束總
由該管巡撫藩司查提不力稽覈不嚴致各屬員任意那缺雖無
偏袒確據實屬顛頑疲玩任意蒙混不肯隨時認真稽查置倉庫
空虛於不同溺職孤恩莫此爲甚所有在任各三年有餘任內那
數最多之前任浙江巡撫另案革職之梁寶常著革去鹽知事職
銜由直隸總督派員解京候補三品京堂前任浙江布政使存興
著卽革職一併交軍機大臣會同戶部刑部查訊明確按律定擬
具奏其餘失察之歷任各上司職名著吳文鎔查明造冊一併奏
交歸案覈辦○以湖北水災命裕泰等遴員查賑並改文鄉試於
九月舉行○己丑禮部尙書成剛卒予祭葬○以惠豐爲禮部尙

書毓書爲熱河都統繇森爲盛京刑部侍郎由內閣○辛卯以陶

樞爲大常寺卿陸元烺爲江西布政使調春熙爲江西按察使以

孔慶瑚爲山西按察使由甘肅○縣森以母老命留京爲理藩

院左侍郎調景淳爲盛京刑部侍郎培成爲盛京工部侍郎由理藩院

○甲午諭本年江蘇浙江安徽湖北等省被水災區較歷屆尤

爲寬廣前經特降諭旨令各該省督撫將藩關各庫銀兩酌留備

賑並准商販米船一體免稅各該督撫等自應仰體朕心極力籌

辦第思嗷鴻徧野安集無期赤子何辜流離失所卽速令籌款賑

撫仍恐緩不濟急無裨目前朕夙夜焦思難安寢饋除准撥各款

飭部議行外著發內府銀一百萬兩交戶部查明被災各區分別

配搭撥款迅卽解交該督撫督率司道嚴飭承辦正印各員激發

天良覈實散放務期無告窮民均霑實惠不至轉徙溝壑庶幾感

召天和回春可望當此經費支絀之際朕不惜帑金以甦民困各省大吏儻不認真經理致被不肖官吏侵吞朘削不惟無以對朕其何以對此億萬災黎耶懍之勉之

秋七月丁酉諭前因各省災區米漕增昂降旨將湖北江浙安徽等處一體免商販米稅茲據裕泰等奏請所有四川江西商販米船運至湖北售賣並本省請照出境採買者經過關津均免納稅循例止收船料等語著再申諭如有米船至湖北省著迅速驗明不准關役人等留難阻滯免稅放行以廣招徠而紓民困○戊戌協辦大學士吏部尙書陳官俊卒命悼郡王奕誼奠茶酒晉贈太子太保入祀賢良祠予祭葬諡文愨賞其孫厚鍾舉人○調賈楨爲吏部尙書以孫瑞珍爲禮部尙書王廣蔭爲左都御史調陳孚恩爲工部左侍郎以趙炳言爲刑部右侍郎馮德馨爲湖南巡撫

楊文定爲江甯布政使調春熙爲湖南按察使以陳啓邁爲江西

按察使

由廣西左江道遷

○己亥命戶部尙書祁雋藻協辦大學士○庚

子以差使嬾情革內閣學士景慶職○辛丑裁江南揚州府揚運

通判丹陽縣縣丞靈璧縣主簿銅山縣呂梁洪巡檢改揚州府江

防同知爲江運同知○辛亥以錫齡爲內閣學士兼禮部侍郎銜

由詹事遷

○丙辰軍機大臣刑部會奏訊明已革山西巡撫王兆琛收

受商人規費又失察巡捕家丁婪索滋事已革霍州知州楊樹年

挾勢借貸部民銀兩餽送巡撫紅封屬實均請發往新疆效力贖

罪從之○己未戴熙因病請解任命以三品頂帶休致以黃贊湯

爲兵部右侍郎

由左副都御史遷

○林則徐以病免以程喬采爲雲貴總

督張日畧爲雲南巡撫

服闋

○庚申再展江南文鄉試期一月○

召趙光祖來京調駱秉章爲雲南布政使以張集馨爲貴州布政

使徐有壬爲四川按察使

由廣東鹽運使遷

○召普泰來京以張亮基爲

雲南按察使

由雲南府知府遷

○辛酉諭昨已有旨令趙光祖普泰來京

另候簡用見在裕誠計已抵滇提訊廣和控案趙光祖如有應行

質訊之處著暫留雲南俟案結後再令起程來京所有雲南布政

使按察使二缺著程喬采派員署理○癸亥諭徐澤醇奏請將錢

糧久任無虧之知縣優予獎敘一摺山東見任泰安縣知縣朱家

學掖縣知縣李廷樟恩縣知縣邱文藻從前歷任各縣或十餘年

或七八年經徵錢糧絲毫無虧亦無流攤抵款實屬結實可靠不

爲習俗所移見當清查喫緊之際自應逾格施恩以昭激勸朱家

學李廷樟邱文藻均著賞加四品頂帶並交吏部遇有山東及別

省直隸州知州缺出無論題選卽行升補○是月給江西德化等

五縣湖南澧州等九州縣衛水災口糧蠲緩江蘇川沙等二十二

廳縣新舊額賦

八月己巳以德齡爲內閣學士兼禮部侍郎銜

由葉爾羌參贊大臣遷

○王

申諭楊殿邦奏漕船渡黃較遲請豫籌截撥一摺本年四塘漕船指日可全入東境惟節候已遲必須於安陵地方截撥轉運方可無誤回空著直隸總督倉場侍郎卽飭天津道將楊村官撥抵補船隻迅速調齊並酌量添雇民撥飛咨漕運總督詢問應否迎至安陵守候方免臨事周章○丁丑諭陸建瀛傳繩勛奏兵勇擊擒盜船見辦情形一摺勦辦可嘉之至浙洋盜匪屬聚東窰山一帶乘閒伺劫經署上海縣知縣王紹復先後緝獲盜匪丁添來等究出盜首姓名巢穴知會兵勇迅速掩捕多名救回難民候補千總胡維榮等一經確探卽不分畛域奮力擊擒此皆確有可據不比空言擊沈盜船落水無數盡係粉飾之詞辦理實覺大快人意陸

建瀛傳繩勛調度有方均著交部從優議敘王紹復著遇有直隸
州知州缺出儘先升用先換頂帶胡維榮著以都司儘先升用先
換頂帶其餘出力文武員弁著該督撫擇實在出力者酌保數員
候朕施恩至盜首陳雙嬉在逃務卽督拏斷不可令其免脫○陸
建瀛等奏見辦賑務及水退情形得旨臣民之福卽朕之福加以
卿等殫心盡力朕引領東南方寸可慰也○辛巳以程庭桂爲左
副都御史由通政使遷○癸未諭軍機大臣等本日據吳文鎔奏浙省
新漕勢難一律徵收起運請飭於河北遣散游幫水手一摺據稱
浙幫各船增雇緯夫及游幫水手通計不下數萬人本屆新漕停
運必多一經歸次不特滋事堪虞且食指浩繁米愈少而價愈貴
請於河北全行截留令其自謀生計等語此等無業游民本非安
分之徒明歲停運船隻旣多誠恐其回至災區路經江南一帶藉

端滋事其應如何設法分起遣散不至令其流離失所而災區又免滋擾之處著陸建瀛傳繩勛吳文鎔會同楊殿邦迅速妥商會議具奏務須和衷商榷計出萬全毋存畛域之見惟節候已遲必應趕緊籌畫若各執成見止知爲己不恤鄰封日後咎有攸歸其各懷之勉之○丙戌召季芝昌來京署吏部右侍郎以龔裕爲山西巡撫吳式芬爲直隸布政使郭夢齡爲河南按察使病痊按察使○己丑諭鄭祖琛閔正鳳奏土司邊境盜匪竄擾督飭勦辦情形一摺廣西盜匪在毗連廣東一帶地方聚眾滋擾前經兩省會捕擒獲多名茲復糾結夥匪擾及土境經該督撫飭鎮道選派兵勇前往勦辦該匪等膽敢恃眾抗拒都司鄧宗珩帶傷殺賊乘勝前追墜馬殞命旋經該鎮道確探賊蹤督兵開礮轟斃賊匪五十餘人追拏十一人奪獲鐵礮十二位並刀槍多件該匪等勢已大潰紛

紛逃竄惟該處毗連兩省山徑崎嶇難保該匪等不四出竄匿乘
間竊發著該撫仍督飭文武會同廣東員弁於各要隘合力兜拏
務期盡絕根株肅清邊境都司鄧宗珩身先士卒奮勇捐軀實堪
憫惻著加恩照參將例賜卹以慰忠魂○積喇明阿以病免以陳
阡爲福建按察使由廣東惠潮嘉道遷○辛卯前任閩浙總督楊國楨卒予
祭葬賞其子圻烜舉人○壬辰諭裕誠奏被劾人員挾嫌揭告審
明定擬並另開清單呈覽一摺此案雲南已革降調知縣廣和挾
嫌列款具控審明多係虛誣實屬刁詐著照擬從重發往新疆充
當苦差以示懲儆已革州同銜劉元吉與廣和拜認師生迹涉夤
緣復經餽謝銀兩著發往軍臺效力贖罪雲南布政使趙光祖雖
訊無虧短庫項情事惟於幕友得受節禮及假冒頂帶並書吏門
丁種種弊端不能查禁且於廣和誣拏燒香又不揭參著交部嚴

加議處並著卽行來京聽候部議○是月給奉天錦州旗民江西鄱陽等九縣湖南澧州等十州縣衛水災口糧

九月癸卯程煥采以病免調李璋煜爲江蘇布政使以柏貴爲廣

東布政使祁宿藻爲廣東按察使由鹽運使遷○甲辰布彥泰以病免

以琦善署陝甘總督裕誠署四川總督由成都將軍署○乙巳調慶祺爲

兵部右侍郎以書元爲盛京戶部侍郎由左副都御史遷○丙午顏以燠

奏秋汎安瀾賞二品頂帶實授河東河道總督○戊申命署吏部

右侍郎季芝昌在軍機大臣上行走○巳酉實授琦善陝甘總督

以徐澤醇爲四川總督陳慶偕爲山東巡撫由福建布政使遷○庚戌以

慶端爲福建布政使聯英爲江蘇按察使由山東鹽運使遷○壬子徐廣

緒葉名琛奏英人追潮進城約期一事懇乞代奏並將照覆彙底

呈覽諭軍機大臣等進城一事本年春閒已據該國照會以後不

復辨論乃見在復以國王函詢耆英定約各國皆知何以屆期又經阻止懇將此意速爲代奏自緣進城未能如約懷慚尋覈業經該督等酌理準情剴切照覆將來或再有所請仍須以入城之舉揆諸事勢百姓既不相容況罷議進城後貿易漸旺已有明徵若復申前說則商人之裹足不前民人之同心共憤又將如今春故事何苦自取困累該國最重貿易見在貨物流通又何必仍詢前約致令商民疑慮諸多窒礙該國當體會此意安心貿易勿生枝節上而督撫提鎮下而軍民人等旁及諸國斷無以不進城爲羞辱之事否則春閒暫停貿易各國何以將積貯貨物全交公使責令賠償卽此一節可知諸國之心亦不以進城爲然也新領事包靈爲人是否曉事循理並著該督等遇便具奏○戊午命服闋尙書何汝霖以一品銜署禮部左侍郎仍在軍機大臣上行走○辛

西諭前據吳文鎔奏浙幫各船增雇緯夫及游幫水手通計不下數萬人本屆新漕停運一經歸次滋事堪虞請截留河北令其自謀生計等語當交陸建瀛等迅速妥商會議具奏茲據該督撫及漕督等將會同籌辦情形縷晰入奏著照所請所有添雇緯夫一入下水後卽查照成規均行辭退惟舵水人等每復展轉雇覓挽留致仍隨幫歸次卽減歇各船之有名舵水亦應資遣該督等見議將浙省各幫與蘇松軍船一體辦理其游幫短緯人夫多係籍隸山東兗沂及江蘇徐州等處今屆河北收成豐稔一經遣回均可另謀生計著陸建瀛楊殿邦傅繩勛吳文鎔分飭所屬務將冊內無名及游幫短緯人等在於濟甯一帶槩行遣令回籍不准一名過淮儻敢抗違不遵立卽嚴拏懲辦並各遴委妥員按段稽查如有容留之人一併查拏究治其各船有名舵水將來到次派減

並著傳繩勛吳文鎔查照章程妥速資遣亦不准逗留擾害經此次該督撫等定立章程各有專責如果認真稽查斷不至釀成事端另生枝節儻日後有滋擾之處卽按所轄地面將該管大吏重懲不貸懷之○是月給貴州桐梓縣水災口糧並蠲緩額賦緩徵山東濟甯等五十州縣衛被災新舊額賦

冬十月丙寅予故朝鮮國王李奭祭如例○戊辰以文瑞爲左副

都御史

曲通政使

○唐樹義以病免以勞崇光爲湖北布政使吳鼎

昌爲廣西按察使劉繼遷○巳巳命裕誠飭屬碾運四川倉穀四

十萬石接濟災區○庚午以故朝鮮國王李奭子昇襲爵命瑞常

和色本往封○壬申軍機大臣奏據浙江巡撫吳文鎔查明已革

巡撫梁寶常任內存留解司兩款與該年地丁奏銷相符其二十

六年上下兩忙解司銀數不及一成係專指上下兩忙地丁一項

而言別項銀米並不在內梁寶常等尙無代屬通融之弊等語梁
寶常存與無罪可科應飭交該旗籍聽候浙撫清冊送部如有應
行分賠之項由戶部照例辦理從之○癸未諭軍機大臣等朕於
各省貢賦裁汰大半惟河南地方向產百合清潤可食著潘鐸選
擇四五桶解京備用嗣後每年均著按期呈進勿庸加多○甲申
諭本日據大學士潘世恩瀝情奏請開缺朕思軍機大臣夙夜在
公勤勞較甚實非高年所宜潘世恩年逾八旬公勤素著若仍令
其入直不足以示體恤若俟來歲春融赴閣辦事毋庸開缺以示
朕逾格篤眷耆臣至意○諭軍機大臣等昨據薩迎阿等奏俄羅
斯頭人私入邊界阻攔查邊道路查照道光五年成案請飭理藩
院行文開導等語所見是見已交理藩院按照所奏事理酌擬咨
文行知該國薩納特衙門諒必轉飭遵照將哈薩克邊外帶兵頭

人卽日撤回矣惟此時該頭人巴蘭等尙在庫庫鄂羅木河西一帶遊奕該將軍惟當諄飭領隊協領等持以鎮靜密加防範仍一面勤加操演嚴飭卡倫官兵盡心防守俾免疏虞諒該將軍必能權其輕重相機妥辦也○乙酉諭軍機大臣等御史馬沅奏豫籌疏洩安奠河淮一摺本年南河因盛漲漫溢暫開南岸吳城六堡得以化險爲平原屬一時權宜之計而黃水夾沙帶泥而下湖身河道自難免均受淤墊是洩黃後路誠不可不豫爲籌及茲據該御史奏稱北岸之東山安廳屬有二塘該處在王營減壩下游勢極低窪地率荒廢似可籌爲洩黃入海後路著陸建瀛楊以增按照所奏界址先行遴委妥員詳加查察楊以增隨後親往相度陸建瀛於公事之便亦著親勘悉心籌畫如果可行應卽豫爲減洩之計事關保衛河淮諒該督等目擊情形必能相機籌辦不使貽

患將來著繪圖貼說據實具奏○庚寅諭鄭祖琛奏請將捕匪未能淨盡之知府等員摘去頂帶等語廣西前署左江道南甯府知府張熙宇於上思州遷墜土境匪徒拒傷弁兵一案本係所轄境地雖窮追獲犯究未能捕拏淨盡以致餘匪逃竄左江鎮標都司何廷標協同該署道前往靈山一帶勦捕亦未能實力追擊均屬咎無可辭張熙宇何廷標著一併摘去頂帶勒令協同地方文武員弁合力捕拏務期拔除淨盡儻再玩延卽著從嚴參懲○壬辰諭軍機大臣等本年浙江安徽湖北等省被災之區均極寬廣江西湖南各地方亦多偏災見經各該督撫紛紛奏請蠲緩錢漕分別賑貸朕無不悉照所請立沛恩施因思來歲漕額減緩旣多若不豫爲籌裕京倉則三十一年北地數十萬人口食從何而出見在各省被災固多較重之區其並未成災者尙復不少僅恃蠲緩

所贖之漕兌運北上尙濟何事爲此剗切諭知有漕各督撫各就
地方情形或妥籌採買或勸令捐輸或由河運或辦海運就積貯
之多寡酌米價之低昂總期源源運京補漕糧之不敷裕倉儲之
不匱中外同享樂利之休方慰朕意斷不可稍存畛域或推諉於
幫費或藉口於歉年竟置京倉短絀於不問該督撫經朕特簡封
圻受恩深重當此災重漕虧之時旣應以本省籌畫爲急尤當以
神京拱衛爲先清夜捫心其能恬然自安乎勉之勉之朕將拭目
視之矣○是月給湖南澧州等七州縣山西徐溝縣被災口糧蠲
緩直隸薊州等三十七州縣浙江富陽等二十一縣山西薩拉齊
等三廳縣被災新舊額賦緩徵安徽宿州等二十四州縣衛湖南
武陵等十州縣衛陝西府谷神木二縣奉天遼陽等七州廳縣湖
北荊門等九州縣被災新舊額賦

十一月甲午朔諭據萬貢珍馳奏匪徒戕官毀署派兵勦捕一摺
湖南新甯縣地方匪徒聚眾滋事擁進縣城戕害知縣寄居該縣
之前署縣家屬同時被害打毀衙署監獄實屬罪大惡極殊堪髮
指該處界連廣西前年猺匪雷再浩勾結民人李輝等結會搶掠
卽在新甯縣地方經湖南廣西兩省會拏勦辦此次復敢進城戕
官必其餘孽復萌且恐首犯李姓卽李輝親屬若不卽行上緊緝
獲必致日久蔓延見經飭委文武員弁帶兵前往合力圍捕相機
督辦計期馮德馨早已接印著卽馳赴該處督率迅捕帶兵遊擊
劉國瑞安能獨當一面著酌委威望較重之大員兼程馳往督拏
所有毗連廣西各處務卽派兵堵緝毋令此拏彼竄總期全數弋
獲盡法懲治以儆兇頑不准一名漏網並著鄭祖琛嚴飭該省文
武員弁實力防堵一有匪徒竄入卽嚴拏痛勦不得稍分畛域以

期立盡根株儻此次辦理稍涉寬縱日後必致養癰貽患不可不慮及也署新甯縣知縣萬鼎恩並前署縣李博家屬均被戕害情殊可憫著馮德馨詳晰查明奏聞其如何起釁根由亦著確查據實具奏○丙申太傅予告大學士阮元卒賜祭葬諡文達予其子候選知府祐服闋後卽選○己亥徐廣縉葉名琛奏英人復前進城疊經反復開導已據文翰將粵民立碑紀功等情寄知該國王嗣接來文所有前詢進城一摺並未提及探聞國王寄信文翰諄諄以生意要緊並傳知五港領事一體察看民情毋許多生別端新領事包靈人亦馴順安靜奏入得旨嘉勉○癸卯諭軍機大臣等本日據馮德馨馳奏匪徒占踞縣城催調官兵親往督辦一摺另片奏接據稟報勦捕情形等語湖南新甯縣匪徒滋事首匪李姓膽敢戕官踞城肆行擄掠經寶慶府知府張鎮南督同新甯汛

千總熊勳猷石門汛把總方開甲等帶領兵勇進剿該匪竟敢率眾抗拒官兵奮力直前殺斃匪徒三百餘名轟斃無數生擒賊匪七名並奪獲礮械該匪逃奔入城我兵僅傷斃鄉勇三名勦辦得手甚屬可嘉張鎮南熊勳猷方開甲等著交部從優議敘出力兵勇由該督撫酌量優獎陣亡鄉勇著查明咨部照例賞卹裕泰馮德馨見計先後馳抵該處當乘此得獲勝仗該匪嬰城踞守之時督飭兵弁一鼓作氣銳力進剿務將首逆李姓生擒辦理並夥黨盧萬先等悉數擒獲不准一名漏網並分派兵勇於各要隘處所相機實力堵禦仍咨廣西巡撫堵截後路勿令分股四出逃竄入山致難搜捕至官兵入城尤須解散脅從分別良莠毋致玉石俱焚辦理方爲妥善提督英俊昨據奏稱派員帶兵前往著裕泰等隨時酌量有須該提督親赴會剿之處卽行知照該提督迅速馳

往會同督辦○甲辰羅繞典丁憂調龔裕爲湖北巡撫以兆那蘇圖爲山西巡撫蔣蔚遠爲山西布政使王懿德爲浙江按察使岫

東鹽運使

○壬子諭軍機大臣等楊殿邦奏參誤運工員並陳見在

商辦情形一摺已明降諭旨將楊以增摘頂並淮揚道查文經等暫革勒限趕辦矣福濟陸建瀛前有旨飭令速赴清江浦一帶將被淤運河設法挑辦茲楊殿邦奏稱淮揚運河淤墊情形較重節逾冬至頭二塘漕船鱗集該處冰凌火燭在在堪虞雖經該清督並河督楊以增嚴飭所屬迅速籌挑引清濟運但爲日甚迫似此節節阻滯恐各省幫船不能依限歸次勢必貽誤新漕關繫甚鉅著福濟陸建瀛一面會同楊殿邦等趕緊督辦一面確勘運河淤墊處所通籌大局務令回空幫船得以魚貫進行而於來歲重運經臨亦能通利無阻見在同空固屬緊要而河身經此淤墊之後

若不及早疏治貽患無窮遲辦一年必受害愈甚著責成福濟陸建瀛二人悉心籌畫妥速辦理如該河督有辦理不善偏聽道廳以致貽誤之處卽著據實參奏福濟經朕派往不值代人受過陸建瀛兼轄河務儻能作速妥辦無誤回空尙可以功補過所有玩誤要工各員弁著一併查明據實嚴參○戊午諭軍機大臣等本日據裕泰馳奏新甯滋事匪犯見經圍困情形又據馮德馨馳奏遵旨親往督剿各一摺覽奏均悉據裕泰奏稱該匪等先則突開北門擁出燒毀靠城民房冀圖乘夜竄出嗣又製造竹排安放西門城內該處逼近大河路通粵西希冀由彼逃竄並訊出匪犯李沅發先曾潛往廣西全州邀集數百人同赴新甯劫獄戕官頭目李洪蔥於戕官後有遣人往廣西靈川縣各處邀人入夥等語馮德馨甫經到任故摺內敘述未能如此之詳見在該匪等困守一

城志在鉅而走險並句結兩省匪徒爲困獸猶鬪之計非迅速剿辦悉數殲擒何以懲兇惡而淨根株馮德馨計已與提督英俊前抵新甯務卽督飭文武員弁合力進攻趁其負隅固守聚而殲旃不得稍事遷延致令乘閒竄逸其鄰近廣西各要隘尤須嚴密防堵隨時知會巡撫鄭祖琛併力堵截毋令匪黨勾連滋蔓儻中途偵獲奸細係前往廣西邀人入夥者卽跟蹤覓綫設法兇擒一面咨會廣西協同嚴拏究辦總期全數弋獲勿留餘孽是爲至要新甯地方僅止文武數員指揮調度該匪等已覺萬分窮蹙若巡撫提督帶兵到後反令餘匪星散藏匿僻區甚或兩省蔓延根株未絕惟該撫等是問懷之勉之○壬戌正陽門箭樓災○癸亥諭鄭祖琛奏派文武疊次剿捕匪徒情形一摺廣西邇隆土境盜匪聚眾竄擾經該撫選派文武員弁將拒傷官兵要犯拏獲正法其

餘夥匪除節次攻擊格斃不計外見在獲辦二百餘名勢已窮蹙紛紛逃散該處毗連廣東難保不因追捕緊急四川竄匿著鄭祖琛嚴飭文武各官於交界要隘多添兵勇嚴密查拏並著廣東省派員堵截務期殲除淨盡勿留餘孽至護廣西提標遊擊金川營守備段丙南奮勇殺賊受傷殞命實屬可惜可憫著加恩照參將例賜卹慶遠協右營外委吳玉魁賓川營外委巫宜福並前在廣東殺賊陣亡之慶遠協左營把總吳超凡左江鎮標右營把總黃景裕提標左營外委馬金魁均著照例賜卹所有在事文武各官著該撫擇其尤爲出力者酌保數員候朕施恩毋許冒濫○是月賑江西德化等十四縣水災給濟齊哈爾等六城旗民浙江仁等等八場竈丁口糧蠲緩江蘇泰州等七十三州廳縣衛江西德化等二十一縣被災新舊額賦浙江海沙等十四場蠲課緩徵河南

睢州等四十八州縣兩淮富陽等十一場水災賦課展緩甘肅河州等二十一州縣歉收正雜額賦齊齊哈爾等六城通賦

十二月甲子朔諭前因原任山西巡撫吳其濬裁革鹽規潔己奉公當降旨令原籍巡撫查明該故員見有子孫幾人茲據護理巡撫嚴良訓查明覆奏自應特沛殊恩以昭清節所有吳其濬長子候選縣主簿吳元禧三子候選知縣吳崇恩均著加恩遇缺卽選次子分發通判吳榮禧著加恩到省後遇缺卽補四子監生吳承恩五子監生吳洪恩及長孫吳樽讓均著加恩賞給舉人准其一體會試○乙丑諭軍機大臣等福濟陸建瀛奏接奉前旨籌辦回空情形一摺覽奏已悉本年因啓放吳城六堡以致運道淤淺前已有人陳奏嗣據楊殿邦奏參誤運工員並稱淤墊情形較重軍船阻滯堪虞疊經降旨令福濟陸建瀛悉心籌畫妥速辦理茲據

奏稱由高郵寶應溯流而上逐段測探水勢尙非甚淺沿途軍船
與載貨船俱暢行無阻見在頭二塘業已灌放亟應趕灌三塘所
籌將太平河存船暫移太平江騰出河身之處見既勘明事屬可
行該漕督亦無異詞延宕著福濟陸建瀛會同楊殿邦楊以增迅
卽催提放渡務令回空各船剋期歸次庶可以速補遲仍飭將淤
淺處所責成楊以增督員興挑或築壩偪溜刷沙非但攻淤並堪
濟運方爲妥善如河員稍有延玩立卽嚴參治罪儻運升旗丁藉
口刁難有意稽遲亦著楊殿邦隨時重懲事關軍船回空兼籌明
歲新漕重運諒福濟等必能星速籌辦以慰朕廑也○以翁心存
爲內閣學士兼禮部侍郎銜由祭酒遷○丙寅調黃贊湯爲刑部右侍
郎趙光爲兵部右侍郎以季芝昌爲戶部左侍郎署吏部右侍郎○戊辰
調張集馨爲甘肅布政使吳式芬爲貴州布政使以陳啓邁爲直

隸布政使惲光宸爲江西按察使

由廣東鹽運使遷

○庚午諭軍機大臣

等裕泰馳奏匪徒糾眾搶掠派兵剿辦一摺湖南道州等州縣連界所屬之癩子山內見有匪徒盤踞四出搶掠匪首黃三等各有黨與一二百人膽敢負嵎踞險鑄造軍械並編造歌謠徧貼煽惑雖距新甯滋事地方較遠難保非豫糾夥黨謀爲不法急應痛加剿辦馮德馨英俊雙德見均駐紮新甯著酌量緩急情形分派弁兵由該鎮管帶前往會同地方文武協力兜拏務期一鼓就擒迅速撲滅該處介在四邑之間徑雜山深易致竄越務須於各要隘處所嚴密堵緝勿令與新甯匪徒往來勾結蔓延滋擾此時大兵聚集新甯該處匪徒諒已搜捕裕泰雖在湖北而一切調度布置必須籌畫萬全遙爲策應勿令湖南兵單有顧此失彼之虞方爲妥善○辛未 皇太后聖躬不豫 上每日詣 慈甯宮問安○

癸酉諭軍機大臣等福濟陸建瀛奏回空軍船埽數渡黃並催趲歸次情形一摺又片奏勘明引河淤墊酌擬疏挑並繪圖呈覽等語覽奏均悉本年節候已晚回空軍船見雖埽數渡黃惟摺內於各幫歸入運河陸續歸次並未議及若止就滯蓄之水引渠宣洩則是涓滴一止仍形淺閣豈能無誤著福濟陸建瀛接奉此旨迅卽設法疏通淤墊將各漕船催提南下務令各幫克期歸次至空船甫過重運卽來見議估挑各工務當隨時相度督飭趕辦總期啓閉得宜疏濬有法庶空重兩運均無貽誤方爲不負委任○甲戌 皇太后疾大漸 上詣長樂敷華問侍申刻 皇太后崩上哀慟擗踊不能自已以養心殿爲倚廬奉頒 大行皇太后遺誥○諭馮德馨奏查明匪徒滋事根由一摺湖南署新甯縣知縣岳州府經歷萬鼎恩經該匪等倡從不允致被戕害前署令李博

之妻楊氏及該縣書院掌教舉人陳佳保先後被賊偪令自盡義烈可嘉均堪憫惻並著該部從優議卹○乙亥午刻 大行皇太后大歛奉安 梓宮於 慈甯宮正殿 上朝夕行奠獻禮如視膳時哭必盡哀居倚廬席地寢苦諸王大臣懇請還宮不允○諭朕侍奉 皇太后以天下養二十九年仰見 壽履康強齡躋大壺私心慶慰昨於初七日自御園奉 駕還宮連日恭詣請 安知 慈躬偶爾違和竊謂頤養數日卽就安痊詎意高年病勢日臻遽於十一日申刻 仙馭升遐銜恤哀號痛何有極伏念朕自聖母孝淑睿皇后慈馭上賓以來深荷 大行皇太后隆恩覆庇私冀承 歡奉養愛日方長今竟無由再仰 懿顏悲懷難釋欽奉 遺誥喪服二十七日而除朕心實所難安仍當穿孝百日並素服滿二十七月稍伸哀惻至 諭以朕年近七旬勿過悲哀

國事爲重敢不敬遵 遣命強加抑制所有 大喪禮儀著派惠
親王縣愉定郡王載銓大學士耆英尙書文慶敬謹管理○諭向
來各督撫將軍府尹及鹽政關差織造等例貢方物著期年內暫
行停止○是日巳刻 皇四子福晉薩克達氏薨○丙子 上詣
慈甯宮 大行皇太后梓宮前供奠○賞二品頂帶原任協辦大
學士湯金釗頭品頂帶○以祈禱靈應予四川綿州漢大司馬蔣
琬春秋祠祀○丁丑諭馮德馨英俊奏勦平新甯匪徒收復城池
一摺此案該匪等始則拜會搶劫繼而戕官據城並敢四路邀人
抗拒官兵相持四十餘日實屬罪大惡極見經馮德馨英俊督率
鎮道府協及在事文武員弁激勵紳士帶同兵勇於十一月二十
九日用地雷轟開城角該賊匪仍敢抵死拒戰復經兵勇併力前
攻槍礮兼施焚燒賊棚生擒一百六十餘名接殺餘匪不計其數

地方一律肅清官兵酌撤歸伍所辦尙爲妥速惟按捕必應認真勿令餘匪仍匿僻區致貽後患匪首李沅發果否已被焚殺該撫等正可向所獲匪徒根究下落仍自行密訪務得實據備含混奏稱殲斃日後仍有李沅發其人一經發覺朕惟該撫等是問馮德馨英俊督率有方俾匪黨不至蔓延均著交部從優議敘在事文武員弁並著該撫等擇其尤爲出力者酌量保奏其紳士召募鄉勇攻城打仗據稱得力居多著詳細查明分別奏咨獎勵○己卯兩廣總督徐廣縉等奏西洋兵頭亞馬勒在關關外被人殺死該國領事將關關汎兵擄去三名求爲緝兇旋緝獲兇犯沈志亮據供亞馬勒行爲兇暴在三巴門外開闢馬道平毀附近墳墓該犯祖墓亦被平毀心懷忿恨起意殺死除害臣等當卽恭請王命將沈志亮正法梟示札知該領事遂將汎兵三人交出數月以來一

切安靜如常得旨所辦萬分允當可嘉之至朕幸得賢能柱石之臣也○減免直隸安州等八州縣積水旗租○辛巳諭福濟陸建瀛奏通籌湖河大局酌擬添塘避閘繪圖呈覽並查明河督等辦理遲誤請分別議處嚴議革職各一摺又片奏酌籌築壩疏通海口情形又陸建瀛另片自請議處各等語覽奏均悉本年河湖受淤較甚見經福濟陸建瀛周歷親勘悉心體察所有酌議添塘避閘並以時啓放各壩及對壩偏溜攻刷海口之處自必各協機宜確有把握著卽照所議責成陸建瀛會同河督隨時督飭認真安辦總期疏通暢順啓閉得宜漕運既可進行湖河亦免漫溢方稱妥協經此次籌辦之後明歲備復淤淺誤運甚或河流橫決均惟陸建瀛及該河督等是問恐非僅賠修所能了事也至見在同空幫船放入運河後果否暢行無阻能否保其不誤歸次迄未據福

濟等詳細聲敘實所不解並著查明迅卽覆奏以紓朕念福濟於
辦理妥協發摺具奏後卽行回京復命其陸建瀛自請議處並福
濟陸建瀛奏參河督河道廳員等應行議處嚴議革職之處均俟
查明各幫軍船能否歸次具奏到時再降諭旨○壬午 上詣慈
甯宮 大行皇太后梓宮前行殷奠禮○諭本日據楊殿邦馳奏
節逾大寒回空幫船挽放仍形艱滯酌議新漕兌運事宜一摺本
年回空幫船渡黃已遲加以節節套堵灌放其不能暢行無阻已
可槩見至能否不誤歸次昨有旨令福濟等迅速查明具奏茲據
楊殿邦奏各省漕糧已經具報定期開兌而空船尙有二千六百
八十二隻未經下閘恐致貽誤新漕酌議擬辦章程四條呈覽該
漕督職司轉運其勢不得不豫爲籌及豈能坐視貽誤著福濟陸
建瀛會同楊殿邦將所擬各條悉心參酌和衷辦理如有應增添

者仍當會議妥籌一面覈辦一面奏聞不得草率福濟如已起程
北上仍著折回○癸未 上詣慈甯宮 大行皇太后梓宮前行
啓奠禮○甲申奉移 大行皇太后梓宮於綺春園迎暉殿自是
日始 上居慎德堂苦次○諭軍機大臣等本日據馮德馨奏提
鎮道員剿匪疏縱請先行交部嚴加議處並自請嚴議一摺又另
片奏道州等屬匪徒業經捕獲數名仍飭團練捕拏等語覽奏均
悉此次新甯縣匪徒滋事彈丸小邑圍困至四十餘日之久釜底
游魂未能剋期殄滅已覺辦理遲延因旣已收復城池殲擒賊匪
多名地方業就肅清尙可解免乃見經馳奏新甯破城之後廣西
貓兒山及新甯羅遠崗各地方又有另股匪徒潛匿滋擾且訊據
見獲各犯供稱有廣西五排人李沅寶聽聞李沅發已被焚殺定
期分股前往新甯爲李沅發報復等語馮德馨初到或未深悉情

形如果該提鎮道員勦捕認真各隘口嚴密防堵何至一經撤兵
餘燼復然顯係李沅發逃竄該匪徒四面接應勾結爲患然則前
此馮德馨所奏勦辦情形竟爲該提鎮等所蒙竇難盡信著裕泰
接奉此旨卽由湖北省選派曾經出師得力將弁數員並挑帶精
兵四五百名迅卽起程馳往新甯等處會同馮德馨督飭各路接
捕各匪務期淨盡毋任一名漏網首匪李沅發係案內要犯豈可
令其逃脫獲犯一百餘名就中作眼綫者諒不乏人何難設法躡
緝著裕泰一面用兵一面將該提鎮等粉飾情節查明據實嚴參
此等不堪文武尙堪護庇耶該提鎮道員如果辦理不善一片謊
言致令首犯脫逃豈嚴議所能蔽辜著先行摘去頂帶且令隨同
協捕俟裕泰查奏後再降諭旨至馮德馨自請嚴議之處俟事竣
後再議○乙酉李振祐以病免以陳孚恩爲刑部尙書翁心存爲

工部左侍郎

由內閣學士遷

○調王懿德爲山東按察使黃宗漢爲浙江

按察使○丙戌

上詣迎暉殿

大行皇太后梓宮前行初祭禮

○丁亥諭軍機大臣等前據薩迎阿奏俄羅斯頭人巴蘭在庫庫

鄂羅木河西紮營收租攔阻巡邊領隊等不令過河等語已由理

藩院行文該國薩納特衙門令其撤回頭人矣茲又據該國薩納

特衙門咨行理藩院文稱近因生齒日繁屬下人眾所有在恰克

圖貿易貨物實不敷用請於恰克圖之外准其在伊犁塔爾巴哈

台喀什噶爾三處添設貿易一併通商等語著薩迎阿等接奉此

旨將此三處地方情形廣諮博採詳加體察究竟有無窒礙據實

迅速密陳是爲至要○諭據鄭祖琛奏湖南新甯餘匪竄越粵境

嚴飭堵剿一摺據稱湖南收復新甯城時適值黑夜陰雨餘匪竄

散並羅源崗一帶有另股匪徒潛匿該處毗連粵西五排山場路

徑叢雜地勢散漫圍捕尤難得力等語粵西辦理防堵並未失算
惟湖南文武員弁將賊匪放逸急應爲補牢之計著鄭祖琛嚴飭
文武員弁厚集兵力不分畛域深搗巢穴毋令一名竄逸並於境
內各山場實力搜捕將藏匿各匪痛加剿除以期除惡務盡勿貽
後患首匪李沅發雖據湖南奏稱被焚殊不可信前經裕泰等奏
粵西貓兒山等處有另股匪徒欲爲李沅發救援難保非卽該匪
在內指使著鄭祖琛密飭在事員弁細心偵訪擒誅爲要所有已
獲各匪犯著於錄供後仍解歸湖南交裕泰等審擬辦理○諭劉
韻珂等奏見在誘獲洋盜提省審辦一摺著名盜匪陳雙喜率領
首夥一百餘人駛至廈門投首並將船隻礮械一併首繳其不敢
再行抗拒已可槩見著該督等派委幹員研訊明確應如何辦理
之處妥議具奏○己丑諭前據福濟陸建瀛奏查明南河辦理遲

延實情請將河督道廳各員分別議處嚴議革職並陸建瀛自請
議處當經降旨俟查明軍船能否歸次再降諭旨茲據福濟陸建
瀛覆奏籌辦回空情形一招並陸建瀛楊以增自請嚴議等語本
年南河吳城六堡啓閉皆不如法以致河湖受淤回空軍船不能
如期歸次雖見在各幫船俱已接續趨出清江開據稱年內可以
竣事然仍係約略之詞且使有漕省分不能不豫籌迎兌紛紛建
議大費周章專轄之員實難辭咎陸建瀛楊以增著先行交部嚴
加議處且看果否不誤新漕俟覆奏到時再降諭旨至辦理有乖
機宜之淮揚道查文經著照議卽交部嚴加議處撤任外南同知
王湘外南營守備師長鍾亦著照議革職所有各幫船出關後能
否迅速渡江分別歸次受兌淤墊處所能否迅速挑挖深通重運
經臨果否暢行無礙該督與河督等有無把握著福濟陸建瀛會

同楊殿邦楊以增妥籌嚴辦該漕督所議四條有無增損迅速具奏○庚寅諭軍機大臣等本日據裕泰奏官兵追捕匪徒致被戕害一摺湖南新甯匪徒逃竄入山官兵遷延日久不能剿滅前經降旨令裕泰迅卽馳往會同馮德馨督辦茲據奏稱十二月初四日該匪逃至大稍筒附近嶺後都司張心銘等分途追捕被匪衝出抵拒守備熊釗候補府經歷劉炳南俱被戕害殊堪髮指並據稱訊出首逆李沅發之叔李承莫供認先期往廣西五排等處利邀夥黨二百餘人來至新甯屯聚距新甯止二十餘里該文武帶兵各員何至毫無覺察且匪徒果止此數守備熊釗等帶領兵勇奮力追擊何至遽被戕害是半山衝出匪徒卽係新甯城內竄出其爲湖南文武員弁設詞蒙蔽彌縫掩飾毫無疑義此等小醜不值另調他省兵勇見在裕泰諒早已登程前往止須督飭將各崗

盤踞匪徒及相接粵西交界處所偵探竄逸各犯迅速擒拏及早撲滅毋得曠日持久糜餉勞師是爲至要所有該提鎮道帶兵各員因循債事著裕泰卽行查明首係何人貽誤軍機違照前旨一面革職拏問一面由驛馳奏○辛卯准各省駐防文舉人見任京官者一體會試○春佑丁憂以恒毓兼署盛京禮部侍郎兵部侍郎○是月緩徵江蘇太倉等二十三州廳縣水災額賦○是歲朝鮮琉球越南入貢○會計天下民數除甘肅福建臺灣府數除甘肅江蘇浙江福建未報外各省通共大小男婦四萬一千二百九十八萬六千六百四十九名口存倉米穀二千五百七十二萬六千六百六石三斗三升三勺

東華續錄

道光六十

臣王先謙敬編

臣周瀾潤恭校

道光三十年庚戌春正月甲午朔日有食之○乙未諭王大臣等奏奉移 大行皇太后梓宮因朕年近七旬氣體尙未復元合詞

籲懇勸朕停止親送奉安大禮何敢不送何忍不送惟諸臣情詞懇切若不稍減儀文亦無以安諸王大臣之心三月二十日朕由

綺春園跪送後先赴黃新莊行宮每站 蘆殿距行宮遠近不一或有礙難前往之處著俯從王大臣等之請稍節勞動每日在行

宮苦宿所有 蘆殿前迎送儀節忍痛從減○丙申 上詣迎暉殿 大行皇太后梓宮前供奠○諭祁雋藻琦善奏審明甘肅知

州稟訐上司挾制各款分別定擬一摺此案陝甘總督布彥泰雖

查無贓私重情惟封疆大員關防不密辦理清查致多歧誤並屬
員虛報到任任聽家人售賣衣物種種粗率殊負委任著照議交
部嚴加議處卽行回京聽候部議解任固原州知州徐采鎮原縣
知縣張琅吐魯番同知托克清阿於留省辦理清查事務並不認
真查覈輒隨同藩司劣幕草率了事實屬咎無可辭徐采張琅托
克清阿均著交部議處升任布政使張祥河前署布政使春熙督
辦清查參差舛錯雖在任未久亦著交部議處其隨同畫稿並非
專辦之司道府縣各員著交部查取職名分別議處尋議布彥泰
降四級調用查該督任內本有革職留任之案應卽革職解任徐
采張琅托克清阿降一級調用張祥河春熙降一級留任已革岷
州知州陳昌言以清查虧短經布彥泰列入參款輒敢捏詞誣訐
居心險詐應如祁寯藻等所奏從重發往新疆充當苦差從之○

丁酉諭朕親送 大行皇太后梓宮據王大臣等復合詞再懇停止前往以朕身體尙未復元恐失調護披閱再三哀愴曷極追念臘月十一日以前每次親詣問 安荷蒙 仁慈曲逮寬其祖節示以溫和並因朕體氣未充種種優容惟恐積勞過甚乃今 音容已渺追侍無由僅止執紼相隨諸王大臣等尙極力勸阻自傷 椿齒永感 慈恩不知涕泗之何從也敬念 遺愛未寒朕若執意前往設使稍有失儀既無以慰 在天之靈亦未協事亡如事存之意萬不得已強抑哀懷勉從王大臣等之請停止前往夙夜負疚朕其何辭仍於三月二十日卯刻由綺春園奠酒跪送○戊戌恭上 大行皇太后尊諡曰 孝和恭慈康豫安成應天熙聖睿皇后○庚子 上詣迎暉殿 孝和睿皇后梓宮前行大祭禮○諭軍機大臣等湖南新甯縣城池甫經收復旋有餘匪竄擾疊

經降旨令裕泰馳往查辦此時既已督兵在途矣本日據馮德馨奏餘匪竄至廣西疊被剿殺賊勢已窮見在會合堵拏並稱境內均已安謐舉行團練訪緝等語此案逃匪四竄慮其蔓延爲患正宜及時技拏乃該撫率稱地方安謐一俟粵西事竣即可撤防已恐坐失機宜且當此匪蹤奔竄之際督飭兵勇追捕猶恐不及反欲舉行團練爲堅壁清野之計尤屬迂拘不曉事體若仍令馮德馨辦理此事必致養癰貽患裕泰統轄兩省實無旁貸接奉此旨務當督率兵勇並會同廣西員弁堵拏逸匪總期剋日淨盡斷不可稍留餘孽○甲辰 上詣迎暉殿 孝和睿皇后梓宮前行周月祭禮○福濟陸建瀛奏遵旨會同漕臣酌議籌辦新漕章程查漕臣原奏淮揚運河淤滿自應挑挖等語伏思空運遲滯由於塘河高下過大不得不拘板套塘並非運河不能行走之故見在湖

水充足引河挑工完竣運河至淺處長水一丈內外重運可保暢行無誤若議挑挖非一二月所能蒞事重運到淮反不能不停船待工是慎漕實以誤漕臣等惟有督挑引河以暢源流急挑太平河以去中滿無須興挑運河轉滋糜費至盤驗展期應聽漕臣自行酌辦又江廣幫先期籌運江浙幫趕赴受兌兩節查江廣幫七百餘隻業經提前趕放無庸迎兌其江浙先放之一千餘隻已報陸續出江尾幫亦於年內提出指日俱可盡數趕行與漕臣具奏時情形稍異應查酌成案辦理又各幫借給銀兩以資接濟一節查回空渡黃節節遲滯復因疊次風雪旗舵紛紛乞恩應援案酌減借給江浙幫每船借十五兩江廣幫每船借十兩由各糧道籌款解還從之○乙巳尊 孝和睿皇后陵曰 昌西陵○丙午上不豫先是 上自上年入春以來 聖躬數違和仍每日召對

臣工批答章奏無稍懈未嘗稍自暇逸至是遭 孝和睿皇后大故擗踊摧傷疾增劇○丁未卯刻 上疾大漸召宗人府宗令載銓御前大臣載垣端華僧格林沁軍機大臣穆彰阿賽尚阿何汝霖陳孚恩季芝昌總管內務府大臣文慶公啓鐫匣宣示 御書皇四子立爲 皇太子諭曰爾王大臣等何待朕言其同心贊輔總以國計民生爲重無恤其他○午刻 上崩於圓明園慎德堂苦次○遺詔曰朕蒙 皇考仁宗睿皇帝覆載隆恩付畀神器臨御天下盈三十年仰維 列聖家法一以敬 天法 祖勤政愛民爲本自維薄德敢不朝乾夕惕惟日孜孜故自御極至今凡披覽章奏引對臣工盱衡宵衣三十年如一日不敢自暇自逸並躬行節儉爲天下先嗣位之初卽頒手諭首戒聲色貨利一切游觀玩好稍涉侈靡之事禁絕勿爲此薄海臣民所共見溯自西陲

小蠶出師捷伐旋致救平何敢自矜武略迨後東南瀕海之區因貿易而啓紛爭朕維古之君子愛人爲大何忍無辜赤子慘罹鋒鏑是用捐小忿成大信綏疆柔遠於今十載卒使毒蝕自消民夷各安生理此朕孳孳愛民之隱衷至今日而庶堪共諒者也至水旱成災朕竊自愧致累吾民昕夕憂勞不惜特發帑金拯民疾苦凡疆臣請蠲請賑無不立沛恩施從未屯膏靳澤已飢已溺之懷亦中外所共見侍奉 皇太后已及三十年娛 志承 歡敬謹罔懈慎終盡禮差免愆尤朕體氣素強自上年春夏之交偶爾違和加意調攝總未復元去臘還宮後痛遭 大行皇太后大事猝踴摧傷漸形虧弱爾來氣益上逆病勢日臻追維在位歷三十年壽登六十有九亦復何憾顧念統緒至重亟宜慎簡元良續承大業本日卯刻特召宗人府宗令御前大臣軍機大臣內務府大臣

親降硃筆諭旨立皇四子爲皇太子並諭王大臣等同心贊輔無恤其他乃降旨甫經半日神氣漸散豈非天乎皇太子秉性仁孝植德貞醇必能欽承付託其卽皇帝位以嗣大統天生民而立之君使司牧之惟刻矢憂勤惕勵於以知人安民永保我不丕基至於觀人之法鑑空衡平妍媸輕重自見惟無私乃克有濟兼願中外文武臣工清白乃心各勤厥職用輔嗣皇帝邇隆之治則朕懷益慰矣喪服仍依舊制二十七日而除布告天下咸使聞知○奉頒御書硃諭四條曰禘郊祖宗伊古所重洪惟我太祖太宗世祖聖祖世宗高宗仁宗豐功駿烈厚澤深仁浹洽生成彌綸宇宙開億齡無疆寶祚立萬世有道鴻謨永宜配饗郊壇禮隆報本朕思尊崇之典莫大於斯若世世禩爲成例率行無已豈止有背於古訓更難示信於後人而又非臣子之

所敢言亦非臣子之所忍言再四籌思不能不定以限制使我後世子孫得所遵循以免後人疵議朕萬年後斷不可行 郊配之禮誣朕以不德不孝若繼體之君顧命之臣不遵朕諭任意強行則是甘爲我大清之不孝不忠之人矣後之人其以朕爲法乎不以朕爲法也嗚呼必有知朕者焉 按禮經天子七廟周禮小宗伯辨廟祧之昭穆至於漢之七廟六室七室唐之九代十一室宋之九世十二室其餘史冊各書不一而足自古議此禮者是非當否又復不一而足由是觀之祧廟之說有由然也洪惟我大清受命於天 龍興遼瀋 祖功 宗德實邁前古自我 太祖高皇帝至我 皇考仁宗睿皇帝巍然七室豈非 上天有以命之乎朕反復思之我大清億萬年無疆之運若不攷古酌今定以法制必致議論紛然爲後人笑矣孔子云非天子不議禮不制度不

考文以朕之不德仰承基緒兢兢業業深恐不能克紹 鴻圖更
曷敢上擬 祖 考然有其位有其時若不身任此事用昭來許
豈不大負我 皇考付畀之恩也朕萬年後斷不可行祔 廟之
禮應如何祀享之處乃當時君臣之事按禮議行可也其 奉先
殿 壽皇殿 安佑宮乃古原廟之制庶可遵循舊制嗚呼七世
之廟可以觀德孰如我大清 聖 聖相承之盛也遵諭毋違
謹按各 陵五孔橋南均有 聖德神功碑清漢二通覆以碑樓
制度恢宏規模壯麗在我 列祖 列宗之功德自應若是尊崇
昭茲來許在朕則曷敢上擬 鴻規妄稱顯號而亦實無稱述之
處徒增後人之譏評朕不取也萬年後著於明樓碑上鐫刻大清
某某皇帝清漢之文碑陰即可鐫刻陵名嗣皇帝卽欲換作碑文
用申追慕卽可鐫於宮門外之碑上斷不可於五孔橋南別行建

造石柱四根亦不准樹立碑文亦不可以聖神功德字樣率行加稱若當時君臣不能體朕懷不遵朕諭是陷朕於不德一世之憂勤惕勵盡成虛文矣蓋謂之孝乎蓋大不孝也 大內四執事庫向有供奉 列祖 列宗冠服所以昭法守而傳儉樸也乃相

沿已久愈積愈多且錦文珠繡遞漸加增殊失垂示後昆之意朕萬年後止可將常用之秋冠涼冠各一縣袂衣服四五襲照例收貯外餘皆酌量留用或爲賞賜之需皆可再皮冠皮裘豈是經久之物一槩不准存留以歸簡約其自鳴鐘殿內收貯歷代硯墨尤屬無謂並非尋常御用之物僅將懋勤殿永不動用庫貯者照數移收實屬虛文卽應裁止○奉 硃諭皇六子奕訢封爲親王○是日酉刻恭奉 靈輿進宮戌刻大斂奉安 梓宮於乾清宮○二月乙丑奉移 梓宮於圓明園正大光明殿○四月甲戌恭上

尊諡曰

效天符運立中體正至文聖武智勇仁慈儉勤孝敏

成皇帝

廟號

宣宗○咸豐二年三月壬子丑刻葬

慕陵

上在位三十年

聖壽六十有九

上表裏文武昌明正學讀

御製詩文各集養心殿四箴養正圖六十什無非聖功王道所見
端而續緒貽謀尤於跋養正四箴三致意焉 御極三十年每值

郊壇大祀春秋謁

陵必躬必親極誠極敬時或

大雪步禱

親譔祝辭肫肫以責己省愆爲民請命盛京謁

祖陵愴念

前

型省觀舊俗憬然於肇造之艱難

躬行節儉爲天下先頒聲色

貨利諭垂戒方來萬方作貢成規裁汰過半且木蘭秋獮亦復量

爲展緩則用意益深遠矣每歲仲春耕藉費粟劬農國有大慶輒

免積逋數百千萬無少愆秋讞慮囚至詳且慎揆官牧民之治刑

期無刑以致鯁民蜚族重譯敏關亦皆矜彼憫愚同我覆載若夫

命將徂征師行萬里告成於 太室宣豫於 慈闈泐石於泮宮
圖勳於紫閣以及偏隅不靖威弧所指悉本 廟謨蓋智勇得之

天生而神武不殺寬嚴交濟故莫不震疊若是其隆也他如教
國語習騎射則本業毋荒正科十舉恩榜五開則人才蔚起修河
防者六籌海運者二則動合機宜經緯萬端貞釐百度上蟠下際
魏乎煥乎逮事 文母以天下養三行慶典六上 徽稱極天家
盛事洎 璇宮棄養 聖體先已違和擗踊摧傷遂至大漸以視
舜之大孝五十而慕夫何閒然往者回疆平定廷臣以尊號請卻
而不俞迨宣昭 遺訓舉配 天祔 廟鐫碑陳器諸大典欲及
身而罷之 聖天子聖不自聖之實心迴越千古矣粵稽堯舜禹
皆曰成功湯曰成湯周曰成周惟 宣宗成皇帝克集大成是卽
車攻吉日作爲雅歌不足以媲美萬一若漢之本始唐之大中明

之宣德方茲茂矣繼自今丕顯丕承視此方策
德至矣哉真神
明之式哉